

EKANISA EY'OMO BIBILIA

Byamabindulhwa omo Lhukonzo
na TALIWABO Bwambale Ezakiel
SIKULIMBA Sedrack
TALIWABO Rabson
Church of Christ - Kasese Town
P.O. 305, Kasese, Uganda.

Byahandikawa
J. C. Choate

Published by:
World Evangelism Publications
Winona, Mississippi

EBY'ERIGHENDERAKO
OKWABO
ABAKASONDA ERIKOLESYA EKITABU KYINO
NG'EKYERYIGHIRAMO BIBILIA

Soma omwatsi ono ghondeke haghuma n'e Bibilia yaghu kutse Endaghano Enyihya-nyihya neryo ghuhambe olhuyani ghusubemo ebibuulyo, eky'eryigha oko ky'eryigha okulhuyani ghuthoke erikangania ebibuulyo ebyamasuubiibwamo nganibya ky'eryigha kyahi, ghubike ndeke akatabo niikwa ebibuulyo n'erisubirya lyaghu ghubithume oko mukangirirya waghu.

Wasiingya erisoma eby'eryigha bino kandi angambi ibyakuwathikya kutsibu.

Omuhandiki.

Eby'eritsuukiirako

Nahandika ekitabo eki mwisomo lye Bibilia kandi mulyabanika habwa esya wiki ikuumi n'isathu (13) isomo oku lisomo omu "weekend magazine" Ekolombo omu Sri Lanka. Omughulhu Ebirenge kanio byabya ibihambire oku bathasi ndeke Ekanisa y'omukama. Munalengesya eribyoalhobya. Obuli isomo likatsuuka erirebya ebikulhu bikulhu omwisomo Eryabirilhaba neryo kandi iwakwama Ebibulyo okubuli isomo.

Thwabere-thwahika New Delhi, India, Muthwahu-lhukya amasomo ano omokatabo. Ekitabo kyino kyabiri hulhukiibwa omo mibuughe mingyi kandi kyikalholha embere Erikolesiibwa munabwire. Linyuuma

mukyasakangwa omo Lhusiri-lanka, Singapore, Guatamala, hano omo USA nomo bindi bihugho. Kikakolesiibawa kutsibu omo bihugho ebyo kandi ithwakithuma noko bandi bandu omo kyihugho kyosi.

Ekyilhubirirwa ky'ekitabo kyino, n'ikangya abasomi Ekanisa ye Bibilia. Ngikiriraya indi wamasoma ekitabu ekyi hayima ne Bibilia yaghu, ghukendi-minya ndeke ngoko Omukama awithe Ekanisa nguma. kandi yambithe Erina liwe n'akandi ngoko ghutholere eribya mughuma wa kuyo. Sighukwame ebiinywa byaghu, ghusome iwuwene-wene. Kwamabya inikwenene, ghukiriraye, kwamabya isikwenene ghukughane. Eyo y'enzira nguma nyisa eyo ghukabya iwamahika.

Ngalemba-lemba abakristo erikolesya akatabo kano erikangya Ekanisa y'omukama oko banywani babo. Ghukikolesaye wamabya wanginathoka, ngikiriraya kikendikukolera ndeke.

Ngananzire ekitabo kyino erilhusibwamo ebindi binene omo buthuku obukasa kandi ngasaba ekitabo eki kikolesibawe erihika oko mithima minene busana na Kristo.

J.C. choate
Winona, Mississippi
January, 2000.

Ebiri omo kyitabu

Eky'eryigha 1: Ekyiinywa Ekanisa	1
Eky'eryigha 2: Eryasa ly'eKanisa	5
Eky'eryigha 3: Erisingika Ekanisa	10
Eky'eryigha 4: Eriminyikalha ly'eKanisa.....	15
Eky'eryigha 5: Eriina ly'eKanisa	20
Eky'eryigha 6: Eriyithondeka ly'eKanisa	31
Eky'eryigha 7: Eryingira omo Kanisa	36
Eky'eryigha 8: Eriramyia ly'eKanisa	41
Eky'eryigha 9: Omubiiri w'eKanisa.....	47
Eky'eryigha 10: Obughuma bw'eKanisa	53
Eky'eryigha 11: Eby'erikirirya by'eKanisa	58
Eky'eryigha 12: Eby'enyuuma by'eKanisa.....	65
Eky'eryigha 13: Ekanisa omo mughulhu ono.	

Minya bino: Emyatsi eyi oko nzuuko muyabanika omo musiindo w'eryighiramo eBibilia neryo iyikahuulhuukiibawa obuli yenga omo Katabu k'obuli yenga eKolombo, Siri Lanka.

Eky'eryigha 1

Ekiinywa eKanisā ekyo kaminyiisaya

Sihali oyuwangaghana athi Bibilia siyirikanaya oko Kanisa. Niikwa, Ekanisa yandi? Kandi Kanisa yahi? ebibuulyo ebi hayiima nebindi binene bikendisubibwamo omubundi buthuku, niikwa lino thukayisunza eriminya eKanisā nganiki.

Leka thutsuuke nerikangya ekyo eKanisā yithe. Ekanisa kwayikahulhawa omubibilia sikyikatoliki, siki Angilikani kandi siki yudaya. Ekanisa sikidini, kutse ekyithuunga kyamadini, Ekanisa sikyithunga eky'ekipolitiki, kutse ekyindi kithuunga ekikahiindanaya abandu haghuma. Ekanisa kandi nibya siy'enyuumba eyo ghukahiindanamo abandu. Neryo ibwa kwehi eKanisā yamabya isinguma yokw'ebi, kwehi iyo niki?

Abandu bangyi sibaliminya ndeke eKanisā nga nikiy kusangwa sibasi iyo nganikiy. Kandi sibaliminya ndeke, ekyilhubirilhwa, omuthambo n'akandi omubiri weKanisā.

Niikwa eBibilia yikakanganaya ndeke eKanisā nganikiy. Ekiinywa Ekanisa kikalhuua omo kiinywa kyolhu Yonani kutse olhugiriki "ekkle-sia" kyiti "Ababirikirwe". Kwehi Ekanisa b'abandu ababiriikiirwe, kutse ekyithuunga ky'abandu ababirikirwe erilhuua omo kyihugho, erihuumirwa omo bwami bwa Mughalha wa Nyamuhanga omwanze (Kolosai 1:13). Ekanisa ni mubiri w'ekyinya-mulimu wa Kristo (1 Korinto 12:27). Ekanisa yirimo abosi ababiri-kiiriirya Kristo (Hebrania 5:8,9) kandi ibabirilhamibwa nayo n'erithomekerwa oko Kanisa yiwe (Mariko 16:16, Emibiri 2:47). Erikisingika ndeke, Ekanisa muli abo abakakwama Kristo.

Ekiinywa eKanisa kikabanika omo Bibilia omo mibere ibiri. Ow'erimbere. EKanisa yikakanibaw'ako ng'eyekyihugho kyosi kutse ng'ekyithuunga kya Kristo omo kyihugho kyosi. Kyino kyikabya omo bulengekania bwa Kristo, akabuugha athi "Kandi ngakubwira kuli Petero n'oko libwe eri nasyahiimba eKanisa yaghe n'amaka w'ekuulimu syendisyakindayo n'ahake" (Matayo 16:18). Hali eyindi milhondo minene aho ekiinywa eKanisa kikakolesibawa omo mibere iyanemighuma eryahulha eKanisa eyosi, ehosi-hosi erimiinyiisya ehosi aho eKanisa yangasangibwa omo kyihugho. Yamabya ini Kanisa eyikasanganawa omo masako kwehi eyo yikabya iye Kanisa eyo Yesu abuugha athi akendisya hiimba. EKanisa kandi ikahulhawa ng'eKanisa omo mwanya mulebe. Eky'erileberyako; omughulhu Paulo asakangira eKanisa eya Roma neryo kandi akahulha awandi maKanisa, akabuugha athi "AmaKanisa wa Kristo akabakeraya...". (Baroma 16:16). Paulo syakanaya oko bisomo muthina-muthina niikwa oko maramirywa wa Kristo.

Erithasyakania binene, ghukabana amasako akahulha eKanisaye Korinto, eKanisa ye Efeso, EKanisa ye Filipi, n'awandi manene (1 Korinto 1:2; Efeso 1:1; Filipi 1:1). Ebyosiebibikathalhaya abandibandubakalengekanaya bathi eKanisa ni Kyisomo, siwangasoma oko Kyisomo kyosi omo masako wa Nyamuhanga. Ebyo thulyasoma ahaghulhu, muthukasamalira oko maramirywa omo myanya muthina-muthina neryo obuli iramirywa ini Kanisa ya Kristo omo mwanya oyo, neryo esyosi haghuma isikakolha eKanisa ya Kristo. Kyolhobire thwamibirirwa eby'ebisomo thukasamalira oko Kanisa ya Nyamuhanga kwahererayayo.

Erithasaminya ndeke eKanisa nganikiyi, leka thulebaye Bibilia ngayikahulhaya yithi.

1. Omubiri wa kristo. EKanisa ni mubiri wa Kristo

omo kyiinywa-muliimu. Kristo inyane muthwe wayo (Efeso 5:23). Hali omubiri mughuma (Efeso 4:4). No mubiri mughuma oyo y'eKanisana nguma (Korinto 1:18).

2. Enyuumba ya Nyamuhanga. Ekiinywa enyuumba omo masako kikamiinyiisaya erihika, erithumiinyiisya ngoko eKanisana n'ihika lya Nyamuhanga. Omo 1 Timoteo 3:15, Paulo athi enyuumba ya Nyamuhanga y'eKanisana ya Nyamuhanga oyulihho. Nyamuhanga nithatha nethu thuli baana biwe (Galatiya 3:26,27; Efeso 1:3).
3. Obwami bwa Nyamuhanga. Obwami bukamiinyiisaya ambu hali omwami, neryokwehi Kristo ni Mwami (Eribisulirwa 17:14). Niikwa eribya Mwami hakayitsutsa ihabya ihane obwami (Emibiri. 8:12). Thuli banya-bwami, ekyihugho y'emithano, n'endaghano enyihya-nyihya by'ebiraghiro by'obwami (Matayo 16:18,19).
4. Eririma ly'ebiinyu ly'omwami. Kristo ni mulikiyilikyi, obuli mukristo nimuthahi (Yokana 15:1-8). Omwatsi omukulhu hano n'ikolha omwirima ly'ebiinyu ly'omwami n'erihethya ebighuma busana n'omwami.

EKanisana koyikakanibawako yithya. Hakiri soma emyatsi eno eriwathiikiibwa n'amasako. Wama bana EKanisana ngoko Nyamuhanga asondire iyabya, obulengekania bwaghu bwosi bukendibinduka, n'engebe yaghu nibya.

Ebibuulyo

Ghuhiire oko kyihikire kw'akaliingo.

Inga, Eyihhi 1. Bibilia yikakanaya oko Kanisana

Inga, Eyihi 2. EKanisa ni katoliki

Inga, Eyihi 3. Abandu banene bakakenga eKanisa

Inga, Eyihi 4. Ekiinywa eKanisa kikakolesiibawa omo
Bibilia omo mubere mighuma

Inga, Eyihi 5. Kristo mwabuugha athi
akendisyahiimba eKanisa yiwe.

Inga, Eyihi 6. Esha Kanisa irinda esya Asia nimadini
alinda awayithabere.

Inga, Eyihi 7. EKanisa ni mubiri wa Kristo.

Inga, Eyihi 8. Hali mubiri mughuma.

Inga, Eyihi 9. Kristo y'omuthwe we Kanisa.

Inga, Eyihi 10. Obwami bulihakuuhi eryasa.

Kanganaya ebihikiire:

1. Ahulha ebindu ebyo eKanisa yithe.....
2. Ekiinywa Kanisa kikalhwa omokiinywa
kyolhugiriki kyahi?.....
3. EKanisa yirimo byahi?.....
4. EKanisa yikahulhawa emilhuma ibiri yahi?.....
5. Oyu wabuugha athi akendihiimba eKanisa yiwe
nindi?.....
6. Mwahiimba Kanisa singahi?.....
7. Esha Kanisa irinda esya Asia nisyahi?.....
8. Hali mibiri mingahi?.....

9. Omwami w’abami ni wahi?.....
10. Thutholere erikolhaki omwirima ly’omwami?.....

Usuliraya omobikuuhi:

1. Ekklesia.....
2. Omubiri waKristo.....
3. Enyuumba/Erihika lya Nyamuhanga.....
4. Obwami bwa Nyamuhanga.....
5. Eririma lyebiinyu lya Nyamuhanga.....

Ery’eryigha 2

Eryasa Ly’eKanisa

EKanisa muyithayibuthukira, yatheka-thekawa, yamalhaghulhwako, yamalhaw’abandu neryo ibbwa yamatsuukiibwa. EBibilia yikakanganaya omwatsi oyu owosi.

Eriimbere eKanisa yabyaho omubulengekania bwa Nyamuhanga, Paul akakanganaya omwatsi oyu w’abikirirya be Efeso. Akabuugha athi; “Tupipe Nyamuhanga Thatha womukama wetu Yesu Kristo! Busana n’erimatikana naKristo Nyamuhanga abirithuha omuyisa munene. Abirithuha obuli muyisa w’ekirimu owakalhuua omo myanya y’elhubulha. Nyamuhanga mwayisoha ithwe eribya buwe erimathikana naKristo embere w’erihangikwa ly’ekyihugho, athi thubye ababuyirire butsira bulema embere wiwe, Nyamuhanga busana n’olhwanzo luwe mwayisogha erithuyira mobaghalha buwe busana na Kristo Yesu.

Eri ryabya erisonda liwe erikamutsemesaya. Thupipe Nyamuhanga busana na mughalha wiwe omwanze” (Efeso 1:3-6).

Eky’akabiri eKanisa yahulhawa omo bulhagho mighulhu minene yithe yabya. Isaya athi; “Neryo kyasabya oko biro eby’enyuuma-nyuuma, ekiitwa ky’enyumba y’Omwami Mukulhu kyasahanganibwa ng’ekikulhu ky’ebithwa, kyasyahamibwa endatha oko bithwa ,ebihanda byosi byasyahikaho. Ebihanda bingyi byasyabuugha bithi mwase thuhethukire oko kithwa ky’omwami mukulhu oko Nyuumba ya Nyamuhanga wa Yakobo naye athoke erithukangirirya esyonzira syiwe nethu ithwathoka erirendera omosyombalhu siwe. Kusangwa omo Sioni mwasyalhuua emighambo n’ekyiinywa ky’Omwami Mukulhu kyasyahulhukira eYerusalemu” (Isaya 2:2,3). Yoeli akabuugha athi, “Neryo enyuma waho nasyuuthuulira Omulimu waghe oko bandu boshi; abaghalha benyu n’abali benyu basyaminyerera, n’abasyakulhu benyu basyalholha oko syanzoli; Naghe nasyuuthuulira Omulimu waghe oko biro ebyo oko baghombe baghe b’obulhume n’abobukali” (Yoeli 2:28,29).

Neryo Daneri akakangaya athi; “Noko biro by’abami abo Nyamuhanga w’elhubulha asyahangania obwami obuthendisyaheribwa na kera kutse erithabalha lyabo siryendisyasighirwa abandi bandu niikwa bwasyathulhanga mo bihande-bihande n’eribuugha amami ghozi aya nabo bwasyahangana kera na kera” (Danieli 2:44). Neryo muleke thuubuughe thuthi:

1. Obwami bwabya bw’eritsuuka omo biro by’enyuuma-nyuuma.
2. Obwami bwabya bw’eritsuukira omo bithwa.
3. Ebihanda byosi byabya by’eringira mubo.

4. Nyamuhanga abya w'eryuthulira Omulimu wiwe oko bandu boshi.
5. Bwabya bw'eritsuuka omobiro by'obwami bw'akani.
6. Bwabya bw'erithulhanga amami awandi woshi n'eribyaho kera na kera.

Lithya, Neryo ebyoshi ebi bikabererera hayi, soma Emibiri y'abakwenda 2?

Eky'akasathu, Ekanisa muyalhawa. Yohana athi yiri hakuuhi, (Matayo 3:2). Kyikamiinyiisaya kyithi yabya hakuuhi kutse yabya hakuuhi eritsuuka. Yesu mwalhagha athi, "Kandi ngakubwira kuuli Petero, n'okolibwe eri nasyahiimba ekanisa yaghe; kandi amaka wolhuholho syesakindayo na kera" (Matayo 16:18). Kandi mwabuugha nabo athi, "Kwenene ngabuugha nenyu nyithi hali abandi abimene hano abathendisyaholha bathe balhangira Obwami bwa Nyamuhanga bukahiika n'obuthoki" (Mariko 9:1). Neryo mwabwirabo athi kisakire kithi, Kristo atholere eryaghalhwa n'erilhuubuuka enyuuma w'ebiro bisathu, kandi kithi, Omo liina liwe omwatsi w'eribindulha omuthima n'erireka ebibi n'eribuyira ly'ebibi litholere ibyathulhuughaniibwa oko bihanda byoshi eritsuuka eYerusalemu. Inywe mulibalhangiri b'emyatsi eyi. Neryo mulebaye ngabathumira erilhagha lyathatha waghe. Niikwa mulinde omo muuyi erihika ah'obuthoki bukalhuu endatha bwasyabandaghalirako. (Luka 24:46-49).

Neryo lebaya emyatsi eyi:

1. Obwami bwabya hakuuhi.
2. Kristo mwalhagha erisyahiimba obwami bwiwe.

3. Abaghuma babya naYesu babya b'eribya ibakineho okwitsuuka ly'obwami.
4. Bwabya bw'erihika n'obuthoki.
5. Eribinduka n'erireka ebibi byabya by'erithulhughaniibwa omo liina liwe oko bihandi byosi.
6. Bwabya bw'eritsuuka eYerusalemu.
7. Abakwenda babya b'eryusuuliibwa n'obuthoki obukalhuua endatha omo muuyi we Yerusalemu.

Ghaniraya oko bino omo malengakania, thunemwasa okw'itsuuka lye Kanisa neryo ghukendilhangira bikabererera.

Lebaya omo Emibiri y'abakwenda 2.Ghusomeyo ndeke ngendo thethethe. Abasomi b'eBibilia abosi bakikiriraya bathi EKanisa yatsuuka oko mughulhu oyo. Kandi yatsuukira eYerusalemu. Obuthuku bwabya bw'enyuuma-nyuuma.Omo buthuku bw'obwami bwe Roma. Obuthokyi mubwandaghalha, omwatsi w'eribindulha emithima n'erireka ebibi mubyathuuliibwa. Neryo eKanisa yiriho eritsuuka obuthu obo. Ekanisa eya Nyamuhanga abyawithe omo bulengekania muyatsuuka, obulhagho mubwabererera, n'erilhagha busana nayo lyamabererera.

Ebiibuulyo

1. Ekanisa yatsuuka eribya hayi?.....
2. Nyamuhanga asombolha eKanisa y'omughulhu wahi?.....
3. Thonda abaminyereri basathu abakanaya

okwasaly'obwami.....

4. Obwami bukendisyabyaho erihika mughulhu wahi?.....
5. Oyo walhagha erihimba Ekanisa ni ndi?.....
6. Mwalhagha erihimba eKanisa yandi?.....
7. Mwabuugha athi akendisya hiimba Kanisa singali?.....
8. Obwami bwabya butholere Erihika naki?.....
9. Ekyabya kitholere erithulirwa eYerusalemu ni kyahi?.....
10. Eritsuuka ly'eKanisa wangalisomako hayi?.....

11. Ghuhir'eko akalingo oko; Inga /Eyih

Inga, Eyih 1. Ekanisa muyatheka-thekwa, yamalhaghulhwako, yamalhawa kandi yamahiimbwa.

Inga, Eyih 2. Ekanisa yatsuuka omo bulengekania bwa Nyamuhanga.

Inga, Eyih 3. Yohana mwabuugha athi obwami bw'elhubulha buli hakuuhi.

Inga, Eyih 4. Obwami bwabya bweryasa n'obuthokyi.

Inga, Eyih 5. Eribindulha Emithima n'eribuyirwa ebibi lyabya litholere erithuuliirwa omo liina liwe.

Inga, Eyih 6. Ekanisa yabya y'eritsuukira eYerusalemu.

Inga, Eyih 7. Emibiri 2, yikaka-nganaya eritsuuka ly'eKanisa.

Inga, Eyihi 8. Kyino kyabya omo mughulhu w'obwami bwe Roma.

Inga, Eyihi 9. Ebiro by'enyuuma-nyuuma byabya ibya birihika.

Inga, Eyihi 10. Obulhaghu n'erilhagha mulyabererera.

Usuliriraya ebibuulyo bino ahikwa:

1. Nyamuhanga mwayisoha ithwe eribya buwe erimbere.....
2. Kandikyasabya omo biro.....
3. Nyamuhanga w'elhubulha asyhangania obwami obuthendisya.....
4. Nasya hiimba.....
5. Kandi kithi eribindulha omuthima n'eribuyirwa ebibi bitholere erithuuliirwa eritsuuka.....

Eky'eryigha 3

Eritsuuka Ly'eKanisa

Omo ky'eryigha kyethu eky'akabiri muthukaminye erilhwa omo Isaya 2:2-3, Yoeli 2:25-29 na Daniel 2:44, ini obwami bwa Nyamuhanga kutse eKanisa, bwabya bw'erihimbwa omo biro by'enyuuma-nyuuma; Eyerusalemu Omulimu Abuyirire akahiika, hathi abandu bosi basyingira omo bwami obu, hathi kandi yikendisyabya kera na kera. Neryo Kristo mwalhagha omo Matayo 16:18; Mariko 9:1 nomo Luka 24:46-49; athi akendisyahiimba eKanisa yiwe, athi yasyahiika n'obuthokyi kandi athi omwatsi w'eribindulha emithima n'erireka ebibi atholere erithuuliibwa omo liina liwe oko bihanda byosi. Neryo erisuba oko

Emibiri 2; thukendirebya ngoko omo kyihandi ekyi ebyosi eby'omubulhagho mubya bererera n'erilgha eryosi mulyahikana.

Thwamasoma Emibiri.2, thukasangana ngoko abakwenda babya om'omuuyi we Yerusalisa omo mughulhu oyo. "Neryo ekyiro kya Pentekote kyabere kyahiika, abosi mubabya haghuma-ghuma, neryo-neryo omulenge mwalhuua Elhubulha eribuhirira ng'ebirimi by'omuliro ibikawa ok'obuli mundu mubyikalha kubo.N'abosi mubosuuliibwa n'Omulumu Abuyirire neryo mubatsuuka eribuugha omo yindi miibuughe ng'Omulumu kwahabo eribuugha. Niikwa habya Abayuda abikere eYerusalemu, hab'y'abandu b'ekyisomo abalhuua om'obuli kyihanda munakyihugho.Neryo omughulhu bowa omulenge oyo, endeko muyahiindana.Neryo mubahangya-hangya emithima kusangwa obulimundu mow'abo bakabuugha omo mubuughe wiwe". (Emibiri. 2:1-6).

Ekyasakirwe kyikathasya kanganya ngoko abandu b'omo mahanga manene awabyaho. "Neryo mubatsuuka erisweka nerikukubalha bathi, kw'abosi abakabuugha sibanya Galilaya kwehi, mubabuulya bathi, ko omwatsi abere athi? Niikwa abandi mubasekererya bathi, "babirikunda omu biinyu bihya-bihya". Niikwa Petero mwahangana n'abandi bakwenda erikuumi n'omughuma. Neryo mwatsuuka eribuugha athi, inywe bandu be Yudea, nenyu inywebosi abikere eYerusalemu mwowe ebiinywa byaghe muminye ekyi. Abandu aba sibakundire ngoko mukaghaniraya kusangwa ni ndambi isathu esy'engyakya. Kusangwa ebi by'ebyabuughawa n'omuminyereri Yoeli athi, Nyamuhanga athi ekyi kyasabya oko biro by'enyuuma-nyuuma.Nasyuuthuulira omulumu waghe oko bandu bosi.Abaghalha benyu n'abali benyu basyaminyerera. Nabalhwana benyu basyalholha oko syonzoli n'abasyakulhu benyu basyalhotha esyonzoli..... neryo

obuli mundu oyukalhakira erina lyomwami mukulhu asyalhamibwa”. (Emibiri 2:12-17,21).

Thwamabiriminya ngoko ebyosi ebi byabyaho eriberererya obulhaghu. Petero akaghenda embere erithuulhagho akakangania athi Yesu abya mundu oyo Nyamuhanga asiima embere syenyu omo bithiko-thiko n’ebyeriswekera. Akathasya thuulhagho ngoko Kristo ahebawa ok’obuthoki eryaghaliibwa n’eryiithibwa. Kandi akathuulhagho ngoko Nyamuhanga amulhuubuukaya oko baholi anyabiriboholha amaka w’oluholho. Erilembalemba abamuhulikire akahulha Daudi, erikangya athi Kristo mwabyaho mwaholha niikwa mwalhuubuuka kandi abirihethukira omo Lhubulha eriyikalha oko kyithumbi ky’obwami oko kuboko kw’amali kwa Nyamuhanga.

Erilholha embere, akabuugha athi “Yesu oyo Nyamuhanga abirilhubuukya, nenyu muli balhangiri. Lino ali oko byalha by’amali bya Nyamuhanga, kandi abiribana oko thatha kw’erilhagha ly’omulimu Abuyirire nebyo mukalhangira lino n’eryowa ni luusuunzo lhuwe abirithuthulira. Kusangwa Dawidi mwathahethukira Elhubulha niikwa mwabuugha athi Omwami Mukulhu mwabwira Omukama waghe athi, wikale oko byalha byaghe by’amali, erihika aho nasyahirira esyonzighu syawe omo kithumbi ky’ebisando byawe. Neryo abandu boshi ba Israeli baminye ndeke ngoko Nyamuhanga abiriyira Yesu oyo mwabamba oko musalaba mo mukama na Kristo. Neryo omughulhu abandu bowa ebi mubabya n’obulighe bunene mubabwira Petero n’abandi bakwenda bathi; balikyethu thuyire thuthi kwehi? Petero mwabwirabo athi mubindule emithima yenyu muleke ebibi, kandi obulimundu abatiisiibawe omo liina lya Yesu Kristo busanan’eribuyirwaly’ebibi byenyuneryo mwasyabana olhuusuunzo lhuwa Nyamuhanga y’Omulimu Abuyirire. Kusangwa endaghane ya Nyamuhanga ni busana

nenyu n’abaana benyu na busana n’abosi abali ehali abosi ab’Omukama Nyamuhanga asyabirikira. Neryo Petero mwathuulhagho omobindi biinywa bingyi kandi mwahathikanabo athi muyilhamaye ok’olhulengo lhubi olhu. Neryo abo abikiiriiraya ekiinywa kiwe mobabatiisiibwa. Neryo oko kyiro ekyo abandu nga 3000 mubathomekerwa oko ndeko yabo, kandi omukama mwathomekera oko Kanisa obuli kyiro abalhamiibawa” (Emibiri 2:32-41,47).

Omo kyasakirwe ekyi, eKanisa yomukama muyatsuuka. Ghukendilhangira ghuthi ebyo byabya eYerusalemu obuthoki bw’omulimu Abuyirire mubwuthuulirwa oko bakwenda. kyino kyabyaho eriberererya ebyalghulhawa kera. Petero akabuugha ndeke athi, “Ekyi ky’ekyalghulhawa n’omuminyereri Yoeli” (Emibiri 2:16), neryo ekyo sikyerithikathikira. Erithasya thomeka oko, kyiri kyithi abaminyereeri babuugha bathi ebindu bino bikendisyabya oko mughulhu w’enyuuma-nyuuma n’akandi Petero akabuugha athi byamabererera ng’abaminyereri kobabuugha. Kyikamiinyiisaya kyithi eKanisa muyatsuuka okumughulhu we nyuma nyuma. Amahanga wosi abyaho okokyiro ekyo omwatsi w’eribindulha emithima n’erireka ebibi akathuuliibwa, n’abandu ngesya 3000 mubikiiriirya, bamalhamiibwa n’erithomekerwa oko Kanisa. Neryo kwehi Kristo atsuuka eKanisa eyerusalemu omwaka wa A.D 33 neryo kandi yineho nahathya.

Ebibuulyo

Thuulhagho eyuwabuugha ebiinywa bino:

1. Oyu wabuugha athi akendi-syahiimba eKanisa yiwe.....
2. Oyu wabuugha “kandi kyasabya omu biro

by'enyuuma-nyuuma Nyamuhanga athi
nasyuthulira omulimu waghe oko bandu boshi.....

3. Oyu wabuugha athi mubindule emithima yenyu
kandi mubatisibawa omwaliina Iya Yesu Kristo
busana n'eribuyirwa amalholho wenyu.....
4. Oyu wabuugha athi omwami mukulhu mwabwira
omukama waghe wikale okubyalha byaghe bya
mali.....
5. Oyuwabuugha athi muyilhamaye oko lhulengo
lh'omughulhu ono ni ndi?.....

Kangaya obulhagho obu

1. Obwami bwa Nyamuhang bwabya
bw'erisyahiimbwa mughulhu
wahi?.....
2. Obwami bwabya bw'eritsukira omu muyi wahi? ...
3. Nibandu bangahi abangingira mo?.....
.....
4. Bwabya butholere eryasa na kyi?
5. Bwabya bw'eribyaho erisyahika mughulhu
wahi?.....

Ahulha erilhagha:

1. Ayuwabya w'erihimba Ekanisa ni wahi?.....
2. Yabya y'eryesa na kyi.....
3. Ni byahi ebyabya byeri kangirirya.....
4. Byabya byeri kangiriiriibwa oko mahanga
mangahi?.....

5. Ebyosi ebi byabya byeri kangiriiriibwa omo liina lyandi?.....

Suba omubino Erihwa omo Mibiri y'abakwenda 2:

1. Abathuulibaw'ako Omulimu Abuyirire ni bahi?...
2. Ebiminyikalho byagho byabya ini byahi?.....
3. Petero mwalemba-lemba abandu athi Kristo abya mwaana wa Nyamuhanga?.....
4. Abandu mubabuulya bathik yi.?.....
5. Oyuwathomekera abalhamiibawa oko Kanisa ni wahi?.....

Soborera bino

1. Ekanisa.....
2. Obulhagho.....
3. Pentekote.....
4. Eribatiisiibwa.....

Eky'eryigha 4

Ebikakanganaya EKanisa

Wangathoka ghuthi erisondya omunywaniwaghu oyuthere? Ng'obulikyiro ighukendisondya obuminyikalho obw'erireka iwaminya ahwali neryo iwa-tsuuka erisondya. Wamabana omundu oyuwithe obuminyikalho obwosi ighukendi mwikirirya ng'omundu oyoghulhwe ghukasondya. Kubine bithya, hali bisomo binene omo kyihugho. Omundu angaminya athi oko byosi eya Kristo ngani yahi? Ghukatholera erirebya obuminyikalho

bw'eKanisa neryo iwabukolesya erirebya eyitholere omo sindi. Wamabana eyikathunga obuminyikalho obwosi ghukendiminya ndeke ghuthi wamabana eKanisa eyihikiire. Neryo kwehi obuminyikalho buno nibwahi, bukasangawa hayi? Ebibilia yinawithe erisubirya eryosi:

1. Kristo mwatsuuka eKanisa. “Naghe ngakubwira kuli Petero noko libwe eri nasyahiimba eKanisa yaghe, kandi amaka w’oluholo sisyendisakyind’ayo nakera” (Matayo 16:18).
2. Yatsuuka eyerusalemu. “Kyino kyikasangawa omo” Luka 24:45-49, Emibiri 2:5.
3. Yatsuuka Omo AD 33. Kyino nakyo kyikabanika omokyitabu ky’emibiri yabakwenda 2. EKanisa yikatsuuka ekyiro kye Pentekote.
4. EKanisa yambithe erina lya Kristo. Akakania oko maramiryo muthina-muthina, Paulo akabuugha athi; “Ama Kanisa wa Kristo akabakeraya (Baroma 16:16). Akathasyabuugha akakania n’eKanisa eye Korinto athi; inywe muliKanisa yaKristo” (1 Korinto 12:27). Niikwa omubiri niki? EKanisa (Efeso 1:22,23).
5. Abali omo Kanisa bakahulhawamo, Ba-Kristo. “Nabigha batsuuka eryahulhwamo bakristo AntokiA (Emibiri 11:26). “Neryo Agrippa mwabuugha na Paulo athi, Oku kathambi kake kano ghukayisunza erinyiyiramo mukristo”. (Emibiri 26:28). “Niikwa omundu amaghalhwa ng’omukristo, syakwe buba niikwa apipe erina lya Nyamuhanga omo mwatsi oyu”. (1 Petero 4:16) kandi wibuke, “, Neryo erilama siriri omugundi mundu, kusangwa Nyamuhanga sialitahula erindi rina omo kihughu kyosi omo katikati k’abandu eryangatulamya” (Emibiri 4:12).

6. Kristo y'omuthwe wayo. Kandi iyo nimuthwe w'omubiri wiwe, y'ekanisa, iye ninzuuko, akambere k'erilhuua oko baholi athi omo byosi inyathoka erithunga ehamuli (Kolosai 1:18).

7. Hali eKanisa nguma. Hali mubiri mughuma, omulimu abuyirire mughuma nenyu kumwabirikirikirawa omo maha maghuma. (Efeso 4:4). Niikwa omubiri nikyi? Y'eKanisa (Kolosai 1:18). Neryo kwehi hamabya ihali omubiri mughuma nayo ey'eKanisa, kwehi hali Kanisa nguma.

8. Hali emibere y'eryingira omo Kanisa. Eyi yirimo erikirirya (Hebrania 11:6). Eribindulha omuthima (Emibiri 17:30). Erikangya Kristo (Baroma 10:9,10). Eribatisiibwa (Mariko 16:16) oyukalhamiibawa akathomekerawa oko Kanisa (Emibiri 2:47) na Baroma 6:3,4, Galatia 3:26,27, 1 Korinto 12:13, kikakangiriraya kyithi omundu akabatiisiibawa omo Kristo n'eKanisa yiwe. Erilhaba omw'olhobera ebihano, eryo, omundu akabya inyamabuthwa ngendo y'akabiri omo Kanisa kutse omo bwami (Yohana 3:2,5).

9. Eriramya ly'eKanisa ni ry'engabane. Abakristo batholere erihindana oko kyiyo ky'erimbere omo yenga (Emibiri 20:7) eryimba (Efeso 5:19), Erisaba (Emibiri 2:42), Eryowa ekiinywa (2Timoteo 2:15), Eryibuka oluholho lhw'omukama (Emibiri 20:7) n'erihithya (1 Korinto 16:2).

10. Erikangiirirya ly'eKanisa likalhuua omo masako. Kikikiribawa ahathe erithomek'ako, erilhuusy'ako kutse erisubya ekindu mw'ekyindi (Eribisulirwa 22:18,19). Ebibilia nyisa y'eyikembe-mbethaya eKanisa. Ekanisa siyiryikiriraya ebindi bitabo ebithe Bibilia.

11. Erithondekania eKanisa litholere eryabya

ngamasako kw'akabuugha. Kristo y'omuthwe (Efeso 5:23), n'obuli iramiryo litholere erithunga abakulhu balyo n'abawathikya (1Timoteo 3, Tito 1). Ekanisa ya Kristo siyiwithe omukulhu [Head] kutse bwikalho bukulhu oko Kyihugho [Headquarters].

12.Omubiri w'eKanis. Omubiri we Kanisa ly'erithuulha engulhu (Mariko 16:15,16), Eriwathiikya abali n'obwagha (Galatia 6, Yakobo2) n'erihira omuhwa omo abikirira (Hebrania 3:12-14).

13.Obuli mukristo atholere eribya n'emitsye y'obukristo. Isithwanza ekyihugho (1Yohana 2:15, Yakobo 4:4). Niikwa thutholere erihuulhuukya ebiighuuma bibuya eby'Omulumu Abuyirire (Galatiya 5:22,23). Ababuyirire basa bobakendisyathunga embiitha y'erikotha (Eribisulirwa 2:10).

Bino by'ebiminyikalho by'eKanis, bikalhuua omo Bibilia.Thalebya eKanis yaghu ngayinawithe bino; Eky'erireberyako, thasamalira ebbini bino.Yibulhaye, oyuwatsuuka eKanis yaghe nindi?Yatsuukawa n'omundu kutse Kristo. Kandi eKanis yaghe yatsuukira hayi.Muyanatsuukira eYerusalemu kutse yatsuukira omo ghundi mwanya. Ekyindi, eKanis yaghe yatsuuka mugulhu wahi, yamabya iyatsuuka enyuma wa AD 33, siyangabya ini ya Kristo. Eky'erighunzerera, eKanis yaghe yambere liina lyahi?Lyamabya isirina lyaKristo neryo kwehi yangabya yithi ya Kristo.Nibinene niikwa bino bikabuugha erikuwathikya eriminya eKanis yaghu ngani ya Kristo kutse nganiy'omundu.Lengan'awandi maKanis nganawithe ebiminyikalho ebi wamabya n'omuthima mubuya ngalengekanaya ghukendi minya engabane.

Wamasanga ghuthi eKanis eyaghulimo siya Kristo kutse siyiri omo Bibilia, ngakulemba nyithi iwalhwa muyo. Ghuminye okwenene ghukwikiriraye

wangathomekerwa oko Kanisa eya ghukasomako omo kyiinywa kya Nyamuhanga. Ghukendibya iwamabiribya omo Kanisa omuli omulhamo.

Ebiibuulyo

Handika Erisubirya erihikire

1. Wangabana ghuthi omwira waghū oyuwabiri thalha.....
2. Omo kyihugho mune ebisomo binene?
3. Omundu angaminyā athi eKanisa eyokwenene? ...
4. Ebiminyikalho by'eKanisa ey'okwenene bikasangawa hayi?.....
5. Oyu watsuuka eKanisa ni wahi?.....
6. EKanisa yatsukirahi?
7. Yatsuuka mughulhu wahi?
8. Ahulha eriina lyayo.....
9. Omubiri ni kyi?
10. Abali omo Kanisa mubahulhwa mo bahi?
11. Omo kulhu w'eKanisa ni wahi?
12. Hali maKanisa mangahi.....
13. Ahulha emibere eyo mundu akathomekerewa oko Kanisa.....
14. Omundu akingira athi omu kristo ne Kanisa?.....
15. Ahulha ebye Kanisa yitholere erithunga.....

16. Obuli iramiryo litholere erithungaki?.....
17. Ahulha emibiri isathu eye Kanisa.....
18. Abakristo batholere erikalha omo ngebe ya muthina wahi?
19. Abekendisyathunga embita yerikotha nibahi? ...
20. EKanisa yanginabya ya Nyamuhanga kandi iyatsuukibawa n’omundu?
21. EKanisa eyithatsuuka eYerusalemu yanginabya ya Nyamuhanga?.....
22. EKanisa yanginabya ya Nyamuhanga eyatsuuka embere sy’omwaka wa 33 AD?
23. EKanisa yanginabya ya Nyamuhanga abikirirya bayo bamabya isibambere erina lya Kristo.....
24. Wamalhamiibwa na Nyamuhanga ighukendithomekwa oko Kanisa yahi?

Eky’eryigha 5

Erina ly’eKanisa

EKanisa yamabya yamasako yitholere erithunga erina eriri omo masako.Niikwa hali amaKanisa mangyi aw’abandu awawithe amena muthina-muthina. Kyino mukyasa kithi?.Amaghuma w’oko mena ahabawa erisiikya abatsuuka amaKanisa ayo, nga “Lutheran” abandi bakasiikaya erikangirirya lirebe nga olhubatizo kutse emibere y’erikolha omubiiri ow’Omukama. Abandi bakasiikaya ekyiro nga ekyiro kya Pentekote, kutse ekyiro ky’esabato.N’abandi bakahira amani ok’obwembembethya bw’eKanisa ibakahamba

omuubiri wabo abakulhu (Presibiteri) ab'eKanisa niikwa ebyosi ebi n'ebindi ebithethahulhwa bikayithwalira olhukengerwa, eripipwa n'erisiikiibwa ebyangabere byaKristo ibyahebwa abandu.

Amena w'abandu n'ebitsumbi sibiihiikire, busana n'esyanzumwa hino: Eky'erimbere, bikaleta erighabana. Bikaghaba abandu, bikalwa n'omusabe ow'omukama asaba athi, abosi babye mughuma. Eky'akabiri amasako akaghanagho. Omo Korinto ey'erimbere 1:10-17, omukwenda Paulo mwakanga abikiiriya ngoko kyithahikire eryambalwa amena w'abandu ekyikaleta ibayighaba mo bithunga-bithunga. Eky'akasathu, amena w'abandu akathwalwa omwanya w'erina lyaKristo kandi ithukasoma oko Kristo ambu "Neryo erilhama siriri omughundi mundu kusangwa Nyamuhanga syalithahulwa erindi rina omo kyihugho kyosi omo kathi k'abandu eryangathuulhama" (Emibiri 4:12). Eky'akani, Amena w'abandu akaheraya n'erithalya-thalya abandu abathikiirirye. Eky'akatano; akakyithaya abosi eriilwa oko Kristo. Busana n'ebyi, amena aya athera kandi akaleta ebibi.

Neryo oko Kanisa, Yesu mwalhaga erihimba eKanisa yiwe (Matayo 16:18), kyikabuughawa ngoko mwaghul'ayo omo musasi wiwe (Emibiri 20:28), kandi y'omulhama wayo (Efeso 5:23). Y'omuthwe wayo (Kolosai 1:18), ebi bikakangaya bithi yikatholera eryambalwa erina liwe erimusiikya iyo ng'oyuwatsuukayo, oyuwahiimbayo, omulhama wayo kandi omuthwe wayo. Omughulhu Paulo ahandikira EKanisa eya Roma neryo amathuma erisingikwa ery'awandi maramiryo omo mwanya oyo mwabuugha athi "esyoma Kanisa syosi sya Kristo sikabakereya" (Baroma 16:16), Neryo akakania neKanisa ye Korinto, Paul mwabuugha athya: "Neryo nenyu muli mubiri wa Kristo, kandi inywebosi muli bitsuko byago." Neryo

omubiri amabya iye Kanisa (Efeso 1:22-23), akanaya oko Kanisa ya Kristo. Kandi yikahulhaw'amo "Ekanisa ya Nyamuhanga" (1 Korinto 1:1,2); Emibiri 20:28, obwami bwa Nyamuhanga [1 Korinto 6:9], Obwami bwa Kristo [Efeso 5:5], Obwami bwa mughalha omwanze [Kolosai 1:13] (, Obwami bomukama wethu[2 Pet. 1:11], Ekanisa (Emibiri 13:1), Ekanisa ya Nyamuhanga oyuliho (1Timoteo 3:15), Ekanisa y'erimbere (Hebrania 12:23).

Neryo Ekanisa isiyahulhawa omo liina lighuma lyahi kutse kyinywa kirebe.Kandi ithwaminya thuthi ekya Kristo inikya Nyamuhanga nibya. Amena awosi hano akahulha Ekanisa Yesu ahiimba. Yamabya isiKanisa ya Kristo kwehi iniyandi?Thuhambe amasako wondeke kandi thwahule Ekanisa ngamasako kwakahulhayo. Thukendibya ithwamakolha ekitholere.

Erisuubya oko mena w'abandu abali omo Kanisa, amasako akabuugha ndeke. Eky'eritsuukirako, omunyereri Isaya mwabuugha athi Nyamuhanga asyaha abandu biwe erina lihya-lihya (Isaya 62:2). Erina eryo mulyabuuwa Paulo linyuuma y'ebirimo bingyi (Emibiri 9:15). Niikwa mulhyahebwa erihika aho ab'ebihanda bathungira omuyiisa w'erikirirya Nyamuhanga. Ebyosi ebi mubyabererera omo muyi we Antokia omughulhu abikirirya batsuuka eryahulhw'amo 'Bakristo' (Emibiri 11:26). Embere waho, ithwasoma aho Paulo akangiriraya Omukama Agrippa neryo mwasubiirya athi "Neryo Aggripa mwabuugha na Paulo athi, oko kathambi akake kano,ghuthi wasyanyibindulha eribya Mukristo" (Emibiri 26:28). Erighunzerera omo Petero thukasoma thuthi, "Niikwa omundu amaghalhwa kusangwa ni Mukristo syakwe esisoni, niikwa apipe Nyamuhanga busana n'eribya Mukristo". [1 Pet. 4:16].

Neryo ibwa kyikabuughawa kwenene-kwenene kyithi abakwama Kristo omo mugulhu w'e ndaghane

nyihya-nyihya bahulhawamo Bakristo kandi Baristo kyisa. Thwamabana awandi mena isiryerya Kristo thukabya isithuli 'Bakristo' abahikene. Erina Kristo likaghabulha omwikirirya oko kyihugho.

Omo byosi erina lye Kanisa n'abikirirya bayo likaha Kristo y'ekitsumbi. Busana nakiyi? Kusangwa nirina ly'erihika (Efeso 3:14-15), eriri eyighulhu ok'obuli rina [Bafilipi 2:9-11). Erina lisa omuli omulhamo (Emibiri 4:12), Neryo thutholere erikirirya omo liina lya Kristo (1Yohana 5:13), ithwa kangya erina eryo (2Timote 2:19), ithwabindulha emithima n'erireka ebibi kandi ithwabatiisiibwa (Emibiri 2:38), ithwahiindana okwiramya omwaliina eryo (Matayo 19:20), ithwakolha ebyosi omo liina liwe (Abakolosai 3:17), thuthoke erithunga engebe y'erikotha erilhaba omo liina liwe (Yohana 20: 30-31).

Busana nebi sihabye mundu akabuugha athi erina s'ikiyi. Sihali mulhamo wosi omo mena n'ebitsumbi by'abandu, n'abakambalbagho bakabya ibamathalha. Hali omulhamo omo liina lighuma lisa, erya Kristo.

Ebiibuulyo

Usuliriraya ebiinywa ebi:

1. Ekanisa yitholere erithunga kyinyamulimu
2. Amena aw'awabandu bakayikolera alimo bubi byahi?
3. "Erisaba lye.....likalhakira bihi....."
4. "Lithya niwe....."
5. "Nyamuhanga angahereraya abandu biwe be...."

Hira akaliingo oko kyihikire:

Inga, Eyihi 1. Ekanisa yinatholera erithunga erina erilhwa omwa masako eribya yokwenene?

Inga, Eyihi 2. Amena aw'abandu bakayikolera, syatholere?

Inga, Eyihi 3. Omulhamo ane omo liina lya Kristo?

Inga, Eyihi 4. Omukama anganikirirya itwebosi eryambalha erina lighumerera omughulhu ono?

Inga, Eyihi 5. Omundu anganahererya Omukama y'olhukengerwa isy'athambalha erina liwe?

Hereraya esyanzumwa esitholere:

1. Amena aw'abandu bakayikolera atsuuka athi?...
2. Thonda esyanzumwa esikaleka amena aw'aandu bakayikolera athatholera.
3. Kristo mwasabira kyi?.....
4. Buugha ekyo Paulo aby'akolire abere asangana abikirirya ibabiriyighaba-ghaba.....
5. Busana naki eKhanisa yikatholera ery'ambalha erina lya Kristo?.....
6. Thonda ebiri omo Baroma 16:16
7. Omubiri wa Kristo niki omo 1 Korinto 12:27?...
8. Buugha awandi mena w'eKhanisa.....
9. Ekanisa yamabya isi ya Kristo, iyangabya yandi?.....

10. Abikirirya b’eKanisaba babya bakahulhwa mo bahi?.
11. Thonda ebisakirwe 3 ebikakanaya oko liina Omukristo.....
12. Omukama asondire ithwabya bahi omo mughulhu ono?
13. Kyinathokekene eribya mukristo muthina mulebe?.....
14. Busana nakiyithutholere erisumba erina lya Kristo?.....
15. Thukatholera erikolha kyi, omo liina lya Kristo?

Eky’eryigha 6

Erithondeka ly’eKanisaba

Yesu mwatsuuka Ekanisaba (Matayo 16:18) Ekanisaba eyo muli ababirikirwe ehosi (Kolosai 1:13,14), yirimo abalhamiibirwe (Emibiri 2:47), ni mubiri w’ekyinya-Mulimu (Abakolosai 1:18), kandi hali mubiri mughuma (Efeso 4:4).

Ekanisaba yine y’ekihugho kyosi , yirimo Amaramiryo manene, obuli iramiryo muli abikirirya bangyi kikaminyisaya kyithi obusondoli bw’eKanisaba buli om’obuli mwanya butsira oko lhulengo lhw’erihanga kutse ekihugho kyosi.Omo bindi biinywa bithi Ekanisaba y’omukama siyiwithe bwikalho bukulhu oko kyihugho kandi siyiwithe Mukulhu w’ekihugo kyosi.

Amasako akakangiriraya athi Kristo y’omuthwe w’eKanisaba. Thuthalebya bino: “Nyamuhanga abirihira emyatsi yosi omo hamuli yiwe, kandi abirimuhira momukulhu we myatsi yosi busana n’eKanisaba. Ekanisaba eyi ni mubiri wa Kristo kandi n’ihikana

ly'oyukahiikanaya ebyosi ehosi.” (Efeso 1:22,23). “Kusangwa omulhume awith'ehamuli oko mukali wiwe, Kristo ni Mulamya w'eKanisa omubiri wiwe (Efeso 5:23), iyo nimuthwe w'omubiri y'eKanisa kandi iye ni Kambere k'erilhuua omo baholi, inyathoka eribya ow'erimbere omukulhu w'emyatsi yosi (Kolosai 1:18). Niikwa omwatsi oyu akathukangiriraya kyi?. Abirithuulhagho athi iyo nimuthwe w'eKanisa, hali mithwe mingahi?. Nimughuma syalighabanagho n'agundi.

EKanisa eribya eyosi imuli amaramiryomanenen'akandi Kristo ini muthwe w'eKanisa, ekyo kikaminyisaya kyithi Kristo nimuthwe w'obuli iramiryo n'akandi ni muthwe w'obuli mundu oyuli omo Kanisa. Erisosana nakyino, Paulo akabuugha athi, Nyanzire imwaminya ngoko omuthwe w'obuli mulhume ni Kristo. Omuthwe w'omukali y'omulhume n'omuthwe wa Kristo ni Nyamuhanga (1 Korinto 11:3).

Ekyindi, obuli iramiryo litholere erithunga eriyithondeka lyalyo. Kristo inyanabya muthwe, erilhwa omo Kanisa abakulhu n'abawathikya batholere erisombolhwa imobatholera eriyitsutsaly'eKanisa kyinywa-muliimu na kyinywa-mubiri. Abakulhu batholere eritheya emithima y'abikiiriya (Hebrania 13:17), Abawathiikya batholere eritheya ebya kyinywamubiri (Emibiri 6). Ghukyiminye ghuthi amasako akahulha abakulhu b'eriramiryo omwa bunene butsira mukulhu kutse muwathikya mughuma omwa Kanisa erithabalha okwa abandi. Kandi sikitholere abakulhu kutse abawathikya beriramiryo erindi, erithabalha okwa lindi kutse oko wandi maramiryo. Amaramiryo anganasangangana kutse erikolha haghuma niikwa obuli iramiryo irinawithe obwembe-mbethya bwalyo.

Ebiinywa Abakulhu, Abaliisya, abathungereri kutse Presbiteri, ebyosi bikahulha omubiiri mughuma.

Abakulhu ban'abalisa, banaba Prosbiteri. Omo Tito1:5-9, Paulo akahulha ebyo mukulhu atholere eriyira, "Kkandi busana n'omwatsi oyu munakusiigha eKrete erihira Abakulhu om'obuli Kanisa omundu amabya atheko kathingu, omundu w'omukali mughuma, inyawithe abana abikiirirya, isiw'omwagha. Kusangwa omukulhu oyukasondolha omubiiri wa Nyamuhanga litholere inyabya butsira kahinira, syabye oyukayiheka kutse oyukahithana lhuuba, kutse oyuli n'omwiso. Niikwa abye oyukakokaya abagheni, inyanzire ekibuya. Atholere inyabya oyukayihana, oyuthunganene, oyubuyirire, oyukayitheghaya, kandi abye oyukahamba ndeke ekyiinywa kye kwenene eky'erikangirirya lyethu, neryo athoke erihana abandi omwikangirirya lithunganene kandi iniathoka erisinga abali n'obuhaka. Na Timoteo ey'erimbere ikasubamo ebindu bino (1Timoteo 3:1-7). Neryo siy'obuli mundu omuKanisa oyutholere obukulhu bw'eKanisa. Abobasa abali n'ebiminyisyo ebi kandi syabye mughuma niikwa babye banene.

Eriramiryo lyamabya lithe n'abakathunga ebindu ebi, neryo abalhume abosi bakolere haghuma erikolha omubiri w'omukama.

Abawathikya nabo batholere erisombolhwa imo bakolha n'abakulhu, bakahulhawamo bawathikya n'akandi bakakolera ahisi w'abakulhu omo Kanisa. Paulo akakangaya ebyo batholere erithunga. Batholere ibabya abasiikiibwe, abathe b'othulimi thubiri kutse, sibabye abakakunda, kutse ab'omururu, niikwa babye ab'obunya-muthima owene, abandu abakakwama eky'okwenene eky'erikirirya ekyabiiribiisuulhwa. Kandi batsuke erirengwa neryo bamathendebanikako mwatsi, bakole omubiri w'omuathikya. Abakali nabo bangabya abasiikiibwe, sibabye abakathonga abandi niikwa babye abathe kunda, abathereghulha omo myatsi yosi. Abawathikya b'omuKanisa babye abandu

b'omukali mughuma musa kandi abakathegheka ndeke abaana babo n'abali omo nyuumba yabo. Neryo abawathikya ab'omuKanisa abakakolha ndeke bakabana erisiikiibwa ndeke kandi bakathoka erithondeka embere sy'abandu bosu omwatsi w'erikirirya eryo thuwithe busana n'erimathikana na Kristo Yesu (1Timoteo 3:8-13).

Neryo lino ly'erithondekania kyiinywa-muliimo erye Kanisa ya Kristo, Kristo y'omuthwe n'obuli Kanisa iwithe abakulhu bayo nabawathikya, ahasi wobuthoki bwabo, hali abathuliri, Abakangirirya hayima n'abikirirya abosi. Omwithegheka lya Nyamuhanga eriramiryo lighuma ly'amahaba, awandi akasighalha inianiimene ndeke. Awosi n'omwangahaba oko kwenene hakasiighalha nguma nyisa, iyo yikendibya iyiniimene ndeke. Omwithegheka lya Nyamuhanga, obuli iramiryo liyithongwere kutse liyimenie iriryene. Sisihambene hauma omwilhaba omwamathegheko wa bandu niikwa busana nolhwanzo. Akasangira haghuma olhwanzo lhwa Nyamuhanga, inyakolha haghuma, inyabya nguma omo Kristo. Erithegheka lya Nyamuhanga siryangahindulhwa.

Sihali omo masako aho wangasoma ambu Petero kutse oghundi mundu wosi y'omuthwe we Kanisa omwa kihugho kyosi. Sihali aho wangasoma ambu hali omukulhu oyukathabalha amaramiryo manene kutse omuthuliri erithabalha okwa eKanisa. Sihali ahawangabana ambu hali abasombwerwe n'abandu abahisi omo Kanisa [clergy or laity]. Abanya bisomo bangyi babirithalha okwithondekania lya Nyamuhanga ekyikathuma ihabya erighabana linene omo bisomo. Thuyikaka-miriraye erisuba oko Bibilia busana n'eribana emisingyi y'ekyiinywa-masako busana n'erithondekania lye Kanisa.

Ebiibuulyo

Hereraya erisuubirya erihikire oko bobuulyo bino

1. Oyuwatsimba eKanisa ni ndi?.....
2. EKanisa yikolirwe omo kyi?.....
3. Omubiri wa Kristo niwa kyiinywa-mubiri kutse kyinya-muliimu?
4. Hali ma Kanisa mangahi?.....
5. EKanisa ni omo mibere yayo.
6. EKanisa yikolirwe esyangumi n'esyangumi esy'abandu muguma-muguma....
7. Endema y'eKanisa ninay'omoKanisa nguma, kutse y'ekyihugho kyosi?.....
8. EKanisa y'omukama yinawithe muthwe kuna-kyihugho?.....
9. Omuthwe w'eKanisa nindi?.....
10. Abembembethya b'eKanisa bakahulhaw'amo bahi?.....
11. Omubiri w'abakulhu n'abawathikya ni wahi?.....
12. Ni bakulhu bangahi n'abawathikya bangahi abatholere eribya om'obuli Kanisa?.....
13. Ni mena wandi wahi aw'abakulhu b'eKanisa bakahulhaw'amo?.....
14. Eby'abakulhu bakatholera ibabya ibali bikasanganawa hayi?.....

15. Eby'abawathikya bakatholera ibabya ibali bikasanganawa hayi?.....
16. Ekanisa yanganathunga abakulhu n'abawathikya hamabya isihali abatholere erisombolerwa omo myanya eyi?.....
17. Omo mibere eyi, oyuwangemb-embethya ekanisa nindi?.....
18. Abikirirya bahambene haghuma omo Kanisa naki?.....
19. Emithondekere ya Nyamuhanga yangana thasyuwaniibw'ako?.....
20. Petero yumukulhu w'ekalisa, erikwamana n'amasako?.....
21. Thukanasoma oko bakulhu b'ekalisa, ni mukyisakirwe kyahi aho thukabana Bishiop akabya muthungerereri w'amakalisa mangyi?.....
22. Thukanasoma oko Mulisya (Pastor) akabya musondoli w'ekalisa nguma?.....
23. Thukanasoma omo Bibilia mo Clergy kutse Laity?.....
24. Busana naki omo Kanisa muli eriyighaba-ghaba?.....
25. Thughende hayi eribana emithondekere y'ekalisa?.....

Eky'eryigha 7

Eryingira omo Kanisa

Omubyathwamathasoma thwabiriminya omughaso we Kanisa. Kino kikaghumibawa nebyasakirwe kusangwa indi kristo mwaholera eKanisa (Abanya efeso 5:25) indi mwaghulhayo omumusasi wiwe (Emibiri 20:28) kandi indi yamulhamya we Kanisa (Efeso 5:25) neryo ibwa ithwayibulya, Yesu anginaholera ekithawithe mughaso? Anginuthire omusasi wiwe erighulha eKanisa eyithawithe mughaso? Anganabere mulhamya wayo kandi omundu anianginalhamira eyihya yayo? Okwenene erisubamu liri litha eyihi okubibulyo ebi. Neryo ibwa kwehi ekikaleka abandu ibabugha ambu eKanisa siki niki kwehi? Kandi bati ambu omundu anginalhama isyalyathabya munya Kanisa? Abandu abo sibekenga eKanisa nga niki n'akandi babirithebibwa erirengekania bathya.

Kwenene Bibilia siyirikangiriraya yithi eKanisa y'omulhamia, niikwa kandi yikakangiriraya yithi omundu atholere eribya omo Kanisa imwalhamiibwa. N'obwatho ngoko bwanabya isibo bwalhamaya abandu, niikwa Nuha n'erihika liwe mubayitsuutsa eribya omo bwatho imo balhama okwisandakalha ly'amaghetse. N'e Kanisa koyiri yithya. N'akandi, isikyo kyisa niikwa kyiri kyithi omundu oyukalhamiibawa Nyamuhanga akamuthomeka oko Kanisa. Abandu omughulhu bowa engulhu n'eririighayo oko kiro kye Pentekote n'ebiro ebya kwamako, ebisakirwe bithi babya bakapipa Nyamuhanga nerisimwa n'abandu boshi kandi omukama mwathomekera oko Kanisa obulikiro abalhamiibawa. (Emibiri 2:47). Neryo omundu amalhamiibwa akabya mughuma oku bali omo Kanisa. Amabya isimughuma okobali omo Kanisa, syalilhamiibawa. Kyikaminyiisaya kyithi sihali erilhamiibwa okwabo abali eyihya ye Kanisa. Sihali oyuli omo kyisomo oyo wangalhamiibwa.

Eriholya embere neky'erigha kyethu, sihali wangayithomekera oko Kanisa niikwa Omukama yukathomekera oko Kanisa ngoko akathomekera abakalhamiibwa basa neryo kwehi eKanisa yirimo abakalhamiibawa. Omukama akasamalira omuthima , kutse ekyilhubirirwa ekikaleka omundu iniakolha ekyakakolha oko muthiima amabya iniabirithwa omuthima, Nyamuhanga akamuthomekera oku Kanisa, amabya nebindi bighendererwa, mukama syalimuthomekera oku Kanisa yiwe. Ithwe thwangina mwangirira kusangwa sithwangathoka erirebya omuthima wiwe niikwa Nyamuhanga iyo syalimwangirira. Omundu kwabya iniakayiyunga okwa Kanisa, kwehi obuli inianginaliwa na Nyamuhanga mwangabya n'ebibilhubirirwa biwe ng'omundu. Eki kikaleka kristo iniabya yowathomekera okwa Kanisa. Syalikolha sobe omwiminya nganindi oyutholere eribya omubalhamire.

Kristo kwali iyo mulhamya we Kanisa, kandi akathomekera oku Kanisa. Omundu inianga yisunzire kwehi eriminya ekya Kristo akamuyithaghako iniathoka eryingira omu Kanisa . Kino kikanganibirwe buthongole omu kyiinywa kya Nyamuhanga kandi kikabanika ndeke thukasoma oku bandu abalhamibwa e Kanisa yikanatsuka omukithabo kye mibiri ya bakwenda. Eno y'emibere eyo mundu akalhabamo eryingira omu Kanisa.

1. Omundu atholere eryowa okwenene. “Litya erikirirya likasa busana n'eriowa, n'eriowa likasa busana n'erikanginiribwa, n'erikangirirya ni Kristo” (Baroma 10:17).
2. Atholere erikirirya Nyamuhanga na Kristo. “Simuhanga-hangaye emithima yenyu, mwikiriraye Nyamuhanga naghe mu nyikiriraye” (Yoana 14:1).

3. Atholere iniabindulha omuthima erireka ebibi “Ngababwira nyithi, eyihi! Niikwa nenyu mwamatendibindula emitima yenyu erireka ebibi, inywe bosi mwasyahera ngoko banahera batya.” [Luka 13:3].
4. Atholere erikangya kristo ngoko ni mughalha wa Nyamuhanga. Kristo mwabugha iyowene-wene, “obuli mudi oyukanyikanganaya embere sya bandu naghe nasyamukangania embere sya thatha waghe oyuli elhubulha” [Matayo 10:32].
5. Atholere eribatisibwa busana neribughirwa amalholho. Olubatizo olhu n’ithabwa omo maghetse (Baroma 6:3,4); [Emibiri 8:26-39] “oyoyukikiriraya kandi iniabiribatisibwa asyalhamibwa niikwa oyutikiriraya asyasingwa” [Mariko 16:16] Petero mwabwirabo ati, mubindule emithima yenyu, muleke ebibi kandi obuli mudi abatisibawe omuliina lya Yesu Kristo busana n’eribuyirwa ly’ebibi, neryo mwasabana olhuusuunzo l’hwana Nyamuhanga yo Mulimu Abuyirire.” (Emibiri 2:38).

Neryo thwamigh’akyi omwisomo eri? Thwamasanga ambu Nyamuhanga akathomekera oku Kanisa abo abakalhamibawa. Eki kikamanyisaya kithi, omundu amalhobera omukama akalhamibawa kandi omukama akamongera okwa Kanisa. Thwamanya indi erilhaba omwowa okwenene, erikiriryako, eribindulha emithima yethu nerireka ebibi, erikangya kristo hayiima neribatisibwa thukalhamibwa. Neryo omundu amakolha ebi akathomerewa oku Kanisa kusangwa erilhobera Nyamuhanga yonanzira eyo thwangalhamibwamo.

N’ibugha ambu, omukama mwabuugha athi enzira nyisa eyeryingira omu bwami bwa Nyamuhanga lyeributhwa obwakabiri oku maghetse noko

mulimu. (Yoana 3:3-5) niikwa obwami niki? Ye Kanisa (matayo 16:18,19) kristo awithe nzira ibiri omundu eryingira omuKanisa? Eyihi nahake. Neryo omundu amabirikirya akabatisibwa (Iniamabiri buthwa no mulimu abuyirire erilha ba omukyinywa n'erikiriryakyo) omundu akabuthaawa omu bwami bwa Nyamuhanga kutse omwihika lya Nyamuhanga ey'eyiri eKanisa y'Omukama.

6. Kandi Paulo akabuugha athi; thukabatisibawa eryingira omo mubiri mughuma (1 Korinto 12:13) niikwa omubiri ni kyi? Y'eKanisa (Bakolosai 1:18); ni singahi? Ni nguma nyisa (Efeso 4:4; Efeso 1:22, 23) omundu akingiramo athi erilha ba omulhubatiso. Kristo athi omundu atholere erikirirya neribatisibwa imwa lhamibwa (Mariko 16:16). Ekyo kya banya Korinto babya bakolire (Emibiri 18:18). Neryo omundu amabiribatisibwa omu Kanisa akathomekerawa kuyo.
7. Hali nzira nguma nyisa eririlhamibwa kandi ngoko thwamalhangira , omukama Nyamuhanga akathomekera oku Kanisa oba kalhamibwa. Ghune wabya mughuma woko Kanisa eyo thukasoma omwa masamako? Kyamabya ini eyihi, isiwe walhamibwa. Ghusondaye, wighe kandi ghuolhobere Omukama nayo akendi kuthomekera oko Kanisa yiwe.

Ebibulyo

Subiraya ebibuulyo bino:

1. Thwamalhangira kyi omwisomo lyethu erye Kanisa?.....
2. Oyuwaholera eKanisa nindi?.....
3. EKanisa yaghulhawa omoki?.....

4. Omulyamya we Kanisa nindi?.....
5. Thukaminya thuthi eKanisa kuyirimo enduundi?.....
6. Ekikalika abandi ibabuugha ambu eKanisa siyiwithe mughaso?
7. EKanisa yangana lhamya?.....
8. Kinatholere omundu eribya omu Kanisa imwalhamibwa?.....
9. Nuhu n'erihika liwe babya batholere eribya hayi imo balhamiibwa?.....
10. Hanabyaho omulhamu eyiihya wo bwatho.....
11. Oyu kalhomekera abakalhama oku Kanisa nindi?.....
12. Handika omulhondo owakangiriraya ekyi ahaghulhu?.....
13. Omundu amabirilhamibwa akabya iniamibiribya mughuma oku Kanisa?.....
14. Omundu anginayithomekera oko Kanisa ya Kristo?.....
15. Ni bindu bitano byahi ebyomundu akakolha etyingira omu Kanisa?.....
16. Omundu anginalhamiibwa amathendikolha ebindu bithano ebi?.....
17. Olubatizo niki?.....
18. Ekighendererwa kyo lhubatizo niki?.....

19. Obwami niki?.....
20. Ni nzira yahi nyisa ey'omundu angalhabamo eringira omu bwami?.....
21. Omubiri niki?.....
22. Hali mibiri gahi?.....
23. Omundu akingira athi omo mubiri oyu?.....
24. Hali nzira singahi esy'erilhamya?.....
25. Hali nzira singahi esy'eringiirya omundu y'omo Kanisa.....

Eky'eryigha 8

Eriramyanya ly'Kanisa

Ekanisa nikithunga kyababirilhamibwa. Ekighenderwa kyayo niramyanya nerikolera Nyamuhanga erilhaba omo Kristo. Paulo athi “Nebyo muwakolha omukyinyiwa kutse omumibiri, mukole ebyosi omuliina lyo mukama Yesu Imukaha ewasingya oku thatha erilhaba omwiye” (Abakolosai 3:17).

Hali amilhamanya mihanda isathe eyikasangawa omundaghane enyihya-nyihya. Ow'erimbere. Eriramyanya omubuthaminyanya. omughulhu Paulo abya akahethukira Atene, mwalhangira esyosanamu esimuthimbireko neryo mwabuugha athi “Nabere ingalhaba omo muuyi wenyu inyenemulebya ebindu ebyo mukaramaya, muneya ekiherero ekisaireko kithi uku Nyamuhanga oyutasilbwe. Neryo Oyo mukaramaya isimumwasi yo noyo ngabathula-ghanaya” (Emibiri 17:23) ngoko hanabya abakaramaya omubuthaminyanya na munabwire abandu abandi bakaramaya bathya.

Sibabo basa abakaramaya ebisosano [sanamu] niikwa nabo abakakwama ebyabathasi ni banene omu madini.

Eky'akabiri, ekyiinywa kyonwami kikahulha abo abakaramaya busa. Kristo athi bakanyiramaya buyira kusangwa bakakangiriraya amahano w'abandu ngani mahamulho wa Nyamuhanga (Matayo 15:9). Abandu bangyi bakaramaya bathya. Kwenene bakaramaya Nyamuhanga niikwa Eriramya lyabo ni ryabuyirwa, kusangwa bakakangiriraya ebya bandu butsira ebya Nyamuhanga.

Eky'akasathu, ekilnywa kya Nyamuhanga kikahulha eriramya erihikire. Eri lye eriramya omwa kirimu n'omo kwenene. Thukasoma ebiinywa bya Yesu athi "Nyamuhanga ni mulimu nabakamuramaya litholere ibamuramya omu kirimu no mukwenene (Yoana 4:24) lino ly'eriramya lisa erya Nyamuhanga akaligha. Kino kyabya kihikire obuthuku Yesu abya oku kihugho na lino. Niramya erikaghendera Nyamuhanga. Nyamuhanga syalikaka mundu erimuramya niikwa abakamuramaya litholere iba muramya ngerithegheka liwe.

1. Mubahiindana haghuma eryigha. Nomukene indi timoteo mwasomesibwa amasako erilhwa omu bwana (2Timoteo3:15) Paulo mwamuhana ngo muthuliri mulere. "Uyire omuhwa erisimwa embere sya Nyamuhanga ng'omukoli womubirir oyuthe hemuka busana no mubiri wiwe kandi oyu kakangiriraya ndeke ndeke omwatsi wokwenene wa Nyamuhanga" (2Timoteo 2:15) kino kikahamba oku ba Kristo abosi omughulhu bakahindana. Buno bwo buthuku Nyamuhanga akakanganaya na bana biwe erilhaba omukyinywa. Omu mibiri ya bakwenda 20:7 thukasoma indi paul mwathulira ngo mubere mughuma owerisoma ekyiinywa kya Nya muhanga.

2. Mubasaba. Abandu babere babirikirirya omukama

oko kiro kye pentokote, thukasoma indi “mubasiba omwikangirirya ly’abakwenda,neribya haghuma nabo, kandi babya bakahika oku mesa yomukama nokwisaba. (Emibiri 2:42) erilha ba omumisabe abandu ba Nyamuhanga bawithe omughisa owerikania na Nyamuhanga.

3. Mubimba neripipa. Paulo akasakiro abikirirya “mukanaye omo biinywa bye wasingya neby’esyonyimbo nemirenge ey’eripipa Nyamuhanga kandi mwimbe n’eriyira omulenge owene busana nomukama omomithima yenyu” (Efeso 5:19). Thasyasoma abakoliso 3:16 na Baebrania 13:15. Hali eryimba mirundi ibiri; Erikolesya omulenge wobunu hayiima nerikolesya ebyuma. Ekwebi Nyamuhanga anzire kyahi? Nyamuhanga anzire omulenge wobuno. Paulo athi emirenge yethu ipipe erina liwe. Eki kikhaho erikolesya ebyuma. Hanyuma ye Myaka miri , omundu mwongera okwimba kwe ebyuma niikwa Nyamuhanga syalibikiriraya.

4. Mubahiindana erithwa omugati.Thuwithe ekyerireberyako omo Mibiri y’abakwenda 20:7. Omo Matayo 26:26-28nomo1-Korinto11, thukakangiriribawa ambu thukenyule omugati eryibuka omubiri wa Kristo kandi thunywe okulhuthehi kutse oku binyu eryibuka omusasi wiwe. Eki thutholere erikyikolha erihika nalino.

5. Mubahithya. Paulo mwahana abikirirya abegalatiya nabe korinto, “oko kiro kyerimbere omwayenga obuli mundu abike ekhande ky’endundi akabana butsira erilhabya ekibo ekiro nasyahika” (1 korinto 16:2). Thasyasoma 2 Korinto 9:7.

Abakristo b’erimbere babya bakahiindana ekiro ky’erimbere omo yenga, eriramyia omukama (Emibiri

20:7, 1 Korinto 16:2). Mubahanwa butsira erilhabya erihindana lyabo ngemibere yabandi koyiri niikwa basikanaye kandi bayitsinge omwebyo omughulhu bakalhangira ekyiro ky'omukama kikahika hakuuhi (Hebrania 10:25). Abikirirya munabwire batholere erikolha emibere eyo eyeriramyako oko kiro ekyo eky'eriimbere omuyenga. Eriramyako lye Kanisa kwalyolhobire litya niikwa abandi bakathalhuka eririkwama. Bakalengekanaya indi litholere eribya liri, indi imwabya nebyo ebikathutsemesaya, emisabe eyithehwa, nibindi. Niikwa sikokirikithya. Nyamuhanga abirithukangya eryanza liwe okumibere ye riramyako kandi omundu syawithe buthoki bweribindulha endekatheka ya Nyamuhanga. Siwangihako kutse eryongerako ghuthathabana omukyeno kutse erithakirwa lya Nyamuhanga. Nyamuhanga abiri bugha nabandu, n'abandu biwe batholere eryowa. Omwikolha eki, Nyamuhanga iniakiramibwa, eripipwa n'erisikibwa.

Ebibuulyo

Handika ekihikire:

1. Ekanisa yikolirwe mwaki? _____
2. Ekighendererwa kye ekanisa niki? _____
3. Nikiyahi ekitholere erikolhwa omwaliina ly' omukama? _____
4. Thukasoma okwiramyako lye mirundi mingahi omo ndaghane Nyihya-nyihya? _____
5. Paulo abya hayi akalhangira esya sanamu nene? _____
6. Mwakania athiki okwi ramya lyabo? _____

7. Haneho munabwire abakaramaya ngabandu Paulo akanayako? _____
8. Oyuwabuugha athi bakaramaya Nyamuhanga buyira nindi? _____
9. Ekyaleka eriramy lyabo eri iribya iniryabuyira niki? _____
10. Ahulha ekyasakirwe? _____
11. Hanganabyaho abandu abakaramaya Nyamuhanga buyira munabwire? _____
12. Eriramy erihikire niki? _____
13. Buugha ebiinywa ebiri omo Yoane 4:24 _____
14. Kikaminyisayaki eriramy Nyamuhanga omo kirimu? _____
15. Kikaminyisayaki eriramy Nyamuhanga omukwenene? _____
16. Nyamuhanga akanza abandu biwe ibamuramy bathi? _____
17. Nihayi ahothukasoma ngoku abandu batholere eriramy omukama? _____
18. Ahulha ebindu bithanu ebya thukaramayamo? _____
19. Nyamuhanga akakanaya athi n'omundu munabwire? _____
20. Abana ba Nyamuhanga bakakanaya nayo bathi? _____
21. Hali mirundi mingahi eyeryimba? _____

22. Ahulha eryimba erya Nyamuhanga anzire ____
23. Emesa y’Omukama niki?_____
24. Abakristo batholere erihindana kyiro kyahi ki?__
25. Endekatheka ya Nyamuhanga ey’eriramyanya yanginathomekerwako kutse erilhusibwako?_____

Eky’eryigha 9

Omubiiri w’eKanisa

Habwaki eKanisa yiriho? Omughaso wayo niwahi? Omubiriwayo ni wahi? Eribana ekyerisubamo, tukesoma omwa kyiinywa kya Nyamuhanga. Erimbere thukalebaya ngoko eKanisa siyekolha suburo ng’erihimba amathendekero, n’amathambiro, kutse erikolha n’erighulya ebitabo habw’erirondya esyambuulho. Ebi byanganabya ibinowene kandi abakristo ibo ng’abandu bawithe obwiranda eribikolha niikwa simuubiri w’eKanisa. Ebisomo bikathwalha buthuku bunene omo bindu ebi neryo ibalholya embere erilhuua oko ndekatheka ya Nyamuhanga kandi busana nerikolera abandu biwe.

1. Erikangirirya engulhu yowene. Kristo mwakangirirya abakwenda anabilhubuka athalya hethukira Elhubulha “Neryo mughende muyire abigha oko bihanda byosi mubatisayebo omo liina lya ise, neryo mughalha neryo mulimu abuyirire. mukangirirayebo bakole ebyosi ebyo nabiribahana kandi mwibuke injye ko ndi haghuma nenyu ebiro byosi erihika okwihwererera lye mighulhu”. (Matayo 28:19,20). Neryo Yesu mwabwirabo athi, “muye omo kihugho kyosi, muthulhughanaye engulhu oko bandu bosi oyukikiriraya kandi iniabatisibwa asyalhamiibwa

n’oyuthikiriraya asyasingwa”. (Marako 16:15,16). Embere Paulo akahana Timoteo, “Ghuthule engulhu yowene yiwe kandi ghuhathikane erithulhayo omo mighulhu yosi. Okumughulhu mubi kutse oko mughulhu owene, Uminyisaye abandu bondeke, ukungebo, usikaye emithima yabo neriyibombeka ndeke” (2Timoteo 4:2). Hane awandi masakok manene niikwa ano akakangaya abandu eriminya eryanza lya Nyamuhanga busana nerithulha engulhu.

Ekanisa muayakolhaki omo buthuku bw’abakwenda? Abikirirya mo bakolha ekyo mukama ahanabo erikolha.

Mubakangirirya ekyiinywa. Ekitabo ky’emibiri yabakwenda, kirimo eby’erileberyako binene oko mwatsi oyu. Abosi ababinduka ihakabya ihane omuthuliri eryeghesya eriyisunza ly’omukama. Soma Emibiri 2,8,9,10 na 16. Niikwa oyuwathuulira n’erikangirirya nindi? Linyuuma w’eryendereribwa oko bandu ba Nyamuhanga eYerusalemu ebyasakirwe bithi, “Neryo abosi abapanzapanzawa mubaghenda ehosi ibakathulha ekyiinywa kya Nyamuhanga” (Emibiri 8:4).

Ekindi, mubathulha mwatsi wahi? Ekyaghutholere erikolha lyerisoma ehosi aho abandu balhamibawa omukitabo ky’emibiri y’abakwenda neryo ighukendiyilhangirira. Niikwa omwabikuhi, mubasomesya obwa Nyamuhanga bwa Yesu, eky’omundu atholere erikolha imwalhamiibwa, omughaso we Kanisa, esyanungu esy’eriramy, n’omughaso wo bwomezi bwe ki kristayo. Paulo mwaghunzerera athi, “Kusangwa omwatsi wo musalaba ni bukiru oko bandu abakahera, niikwa nibuthoki bwa Nyamuhanga busana nethu ithwe thukalhamibawa” (1 Korinto 1:18).

Erilhuusyaho Nyamuhanga erithegheka athi engulhu yiwe yithuliibawe, Paulo akabuugha athi erikirirya likasa busana n'eriowa ekiinywa kya Nyamuhanga (Baroma 10:17). Kandi Kristo athi "Neryo mwasyamina okwenene n'omwatsi w'okwenene asyabayiramo bo bwiranda" (Yoane 8:32) kandi athi, "basyamulhakira bati oyo batebatikirirya kwehi? Kandi basyikirirya bati oyo bate batowa ko mwatsi kwehi? Kandi basowa bati omwatsi amat'indatguulhwa kwehi?" (Baroma 10:14) Ebyosi bithi omundu athalire (Baroma 3:23, 6:23) Neryo olhwanzo lhwya Nyamuhanga lhutholere erithulirwa (Baroma 5:8). Erikangya indi omundu anawithe omulhamya (Yoane 3:16) kandi omwowa Nyamuhanga omundu asyalhamibwa amalholho wiwe (Baroma 1:16,17, Marako 16:15,16). Abathasi eryanza lya Nyamuhanga kutse abakaghana erikirirya bakesyahera (2 Tesalonika 1:7-9). Neryo ekyiinywa kya Nyamuhanga kitholere erithulirwa.

2. Eriwathikya abathawithe. Thuwithe eby'eri-reberyako omo kyiinywa kya Nyamuhanga athi eKanisa yabya yikatsomana abali omubwagha kandi mubawathikibwa kusangwa eKanisa yabya iyinawithe eby'eriwathikyamo. (Emibiri 2:45). Thukasoma, "Kandi mubagulya esyombibo syabo, n'erighaban'abyo ng'obwagha bw'obuli mundu kubwaya". Kino kyakolhawa omwanza ly'obulimundu. Omo Mibiiri y'abakwenda 6, thukasoma ambu muhabya eriyikunanga ahakathi kaba Yuda nabagiriki kusangwa abakwakali babagiriki mobathaganzwa okwighabirwa akalyo. Neryo abakwenda mubabirikira abigha haghuma neribwirabo indi basombole abandu musangu omo kathi kabo bahebawe olhukwamirwa olhwo mubiri ono.

Thukasoma Paulo akaghenda eyerusalemu eriyawathikya abandu ba Nyamuhanga. Akabuugha athi "Kusangwa kyabiritsemesya amaKanisa we

makedonia ne Akaya erilhabya ekibo busana nabera abali omukathi-kathi kabandu ba Nyamuhanga e Yerusalemu” (Baroma15:26). Neryo Paulo aka sakira abikirirya ekorinto: “Neryo busana nomwatsi weriwathikya balikyethu abandu ba Nyamuhanga, mukole ngoko nathegheka esyo Kanisa sye Galatia. Obuli kiro kyeyenga obuli mundu abike ekihande ky’enduundi akabana butsira erilhabya ekibo ekiro n’asyahiika” (1 Korinto 16:1-2).

Oyutholere eriwathikibwa niwahi? kitholere abera omuKanisa. ekyerimbere babera, abandu bakulhu omo myaka, abakwakali, esyo nguubi, ebiriitho ebikasa isibiyithekathekiirwe. Thukasoma, “Neryo oko mighulhu yosi thukabana akathambi, thukole ebibuya oko bandu boshi, kandi kwilhabaho, thukole ebibuya oko bali omo kithuunga kyabiikiiriirya” (Galatia 6:10). Si obuli mundu ambu akatholera inyawathikiibwa. Omo (1Timoteo 5) thukabana ambu omundu angawathiikiibwa obuli mughulhu amabya isyangayithoka kandi amabya athawithe ow’okwiye oyo wangamuwathikya. Niikwa kandi omundu oyo iniabiriyikangya ndeke ng’omukristo mubuya. Busana nekyo, esyombulhu sya Nyamuhanga sitholere erikolesiibwa ndeke butsira erisihererya owosi-wosi oyo wamasisaba.

Sib’abakristo basa abatholere eriwathiikiibwa niikwa abandu boshi bakatholera eriwathiikiibwa bamabya ibanatholere eriwathikibwa, eKanisa yamabya iyinawithe eby’eriyambamo. Soma (Yakobo 1:27 na Yakobo 2). Eno ni nguma oko nzira y’erikolya engulhu yowene y’oko bandu.

Niikwa esyosente esyo sikalhw’ahi? Sikalhwa omo bikirirya omughulhu bakahiithaya (1 Korinto 16:1,2, 2 Korinto 9:6,7); kyikamiinyiisaya kyithi Abakristo bamathendihiithya eKanisa isiyendithoka eriberererya

olhumimbi lhw'eriwathiikya abathiyithoka.

1. Erihambirira emithima y'abikiriirya. Erihambirira kyikaminyisaya erihimba, erisiikya, eriwathikya abikirirya omo Kanisa bathoke erikulha kyinya-muliimu. Nibindu byahi ebikahiimba abandu? Ekiinywa kya Nyamuhanga, erihindana haghuma, eriraamya haghuma, eriwathiikania, emibiri mibuya, olhwanzo, n'ebindi .Soma Emibiri 9:31; ,Baroma 14:19; 1 Korinto 8:1, 1Tesalonika 5:11, 1 Korinto 14:26; 2 Korinto 12:19 na Efeso 4:12.
2. Erighunzerera omwatsi ono abandu banene bakayibulhaya eKanisa ngayangakolha yithi ebindu ebi isiyiwithe erithondekania ery'ekihugho kyosi, isiyiwithe omukulhu owe kihugho kyosi, n'akandi isiyiwithe esya mbuulho esikakuma-kumawa. Niikwa enzira ya Nyamuhanga ninzira yowene kandi iyo nyisa yenzira eyerikoleramo eryanza liwe kandi ekyi ky'ekyighendererwa eky'eribياهو lyethu omwa kihugho. Yesu y'omuthwe w'eKanisa nobuli iramiryo hayiima n'obuli mundu atholere iniakola olhumimbi lhw'eriwathiikya. Neryo eKanisa yikakolha omubiiri wayo omughulhu obuli mundu akahiithaya ngoko Bibilia yikabuugha.
3. Erithuulira, eriwathikya abali omo bwagha, erihimba abikirirya, ebyosi ebi nikighendererwa kye Kanisa erilhama emyoyo y'abandu, Nyamuhanga angapipwa. Ekanisa siyiwithe ghundi mubiri erilhuusyako ono. Ekanisa siyangingira omubye politiki, eby'obusubure, kutse emibiri y'ekihugho kino eyithe omo masako. Ekanisa ya Nyamuhanga ni ya kyiinywa-mwoyo, yiri omukihugho niikwa siy'ekyihugho. Yikakolha kutsibu eryowa Omukama n'eriwathiikya abandu abosi eribya butsira katingo, erithunganana, erilhama busana nabakristo abayo abosi busana n'eriha Nyamuhanga y'olhukengerwa.

Eyi ye Kanisa y'omukama, omubiri wayo,
n'ekyilhubirirwa kyayo.

Ebibuulyo

Handika erisubamu erihikire.

1. Ekanisa yomukama siyiri omusuburu yahi?_____
2. Abanyamadini banawithe omusango oweriyitsungira omwasuburu omoliina lyedini eribana amaghoba?_____
3. Omubiri we Kanisa niki?_____
4. Ahulha ekihano kyonwami omu matayo 28:19,20 nomo marako 16:16_____
5. Ahulha omubiri abakristo berimbere babya bakolire babiri panzwapanzwa._____
6. Mubakangirirya bindu byahi?_____
7. Erikirirya likasa lithi?_____
8. Ni kyahi ekikathuyira mobobwiranda?_____
9. Omundu angalhamibwa athi?_____
10. Nindi oyukendisyahera?_____
11. Ekanisa yanginahulikirira abali no bwagha?_____
12. Ababya bahererye busana n'abera abandu ba Nyamuhanga eYerusalemu ni bahi?_____
13. Abatholere eriwathikibwa ni bahi?_____

Ni bandu bahi abatholere eritsuuka eriwathi-

kibwa?_____

15. Thonda eriwathiikya likasubulirahi ngalitholere iryasubulira hayi?_____

16. Abo abali eyihya y'eKanisa nabo banginawathiki-bwa?

18. Esyombulhu esy'eriwathikya abathe yithoka sikalhwa hayi?

19. Sitholere erisonga- songibwa kyakangahi?.....

20. Thonda ekiinywa erihimba abikirirya.....

21. Ni bindu byahi ebikahiimba abikirirya?.....

22. Nyamuhanga akahalhambwa n'erisikiibwa athi?

23. Omuthwe we Kanisa nindi?.....
dererya ky'emibiiri ye Kanisa ni kyahi?

24. Ekanisa niyekihugho?

25. Ebye politiki, n'esuburu omo Kanisa, biribithi eyihya okwa masako?

Eky'eryigha 10

Obughuma bw'eKanisa

Ekyihugho ky'ebisomo munabwire kyikabya ngakitsomene kutsibu busana n'erikolha obughuma kwilhaba eyindi mighulhu. Obughuma bw'e bisomo buli omo malengekania w'obuli mundu ehosi-hosi. Enzumwa omw'ekyi yiri yithi kusangwa hali eriyighabulha-ghabulha omo bisomo, omo kyihugho, neryo mughuma-mughuma kutse abosi balhuhiire. Kandi nibya obughuma sibuwithe kubwangabanika

ebithuunga-bithuunga by'ebisomo banikirirye erithendiikiirirania. Eriyighabulha likendisyabya erine, n'omo bangasosana omwa bindi bindu. Neryo eky'erisuubirya ni kyahi? Erisubirya likabanika omo Bibilia iyoyene. Obughuma obw'okwenne eribanika, abandu bakatholera erikirya ebyo bakakangiriraya, esyo ngangirirya syabo, amena, ama Kanisa, n'ebitabu ebikathegheka amadini wabo [creed books], n'ebindi, neryo ibasukulha eBibilia, nerisoma, n'eryigha yo, eryikirirya yo, n'eryolhober'ayo. Neryo imohabya obughuma bw'okwenene, obo Omukama asabira omo Yoana 17. Abandu bamakolha ekyi, abosi bakendyikirirya kyighuma, abosi ibikirirya eryikangirirya lighuma, abosi ibambalha erina eriri omo masako, abosi ibakolera haghuma, ibakangirirya kyighuma, neryo abosi ibaghenda elhubulha yo haghuma. Ikyikendilhoba kutsibu obughuma eribya ibuneho omughulhu omundu akatsira erikwama omundu neryo akatsuuka erikwama Kristo.

Amasako aakatsweba eriyighaba-ghaba. Bibilia yikabuugha yithi Nyamuhanga akapona abakabiba eriyighaba-ghaba omo bikirirya (Emisyo 6:19). Omo 1 Korinto 1, thukabwirawa oko Kanisa ye Korinto eriyighaba-ghaba. Omo kitswa ky'erisiima omutse oyu, Omukwenda Paulo mwayitsuungiramo erighania eritsutsanga ebyaleta obubi obu. Mwatsuuka omwiibuugha athi, "Neryo balikyethu, ngabalembalemba omo liina ly'omukama wethu Yesu Kristo, nyithi inwe bosu mubuugha kighuma. Nyithi Sihabye erigabana omo kati-kati kenyu, niikwa mubohane omo bulengekania buguma n'omutima muguma" (1-Korinto 1:10). Neryo mwaghenda embere akabuulya ebibuulyo bisathu, obuli mundu angalhangira emikolere yabo eyithemo malengekania. Ebibuulyo byebi: Kristo anayigahabire-ghabire? Paulo mwanabambwa busana nenyu? Mumwana batisiibwa omo liina lya Paulo? Omo bibuulyo ebisathu ebi ibangasubamo ambu,

eyihi. Nokweryo, mwabakangana obuuulighe obuli omwiyighaba-ghaba.

Omukwenda iyan'omughuma mwasakira abanyikiwe ab'eRoma athi, "Balikyethu, ngabalemba-lemba, mutegaye busana nabo abakaleta erigabana, abatekwama erikangirirya eryo mwakangiriribawa. Musagebo kusangwa abandu ngabo sibekolera omukama wetu Kristo niikwa bakakolera esyonda syabo .Kusangwa bakatheba emitima ya bandu bate n'amenge, omo binywa bitendere n'ebyekisehya". (Baroma 16:17,18). Omo Kolosai 2:20-22, aka buugha athi, "Mwamabya imwabirihola na haguma na Kristo oko mitsye y'abandu n'eyabaliimu, abakatabala oko bihugo, busana naki mukinakwama ebihano n'amalengekania w'ekihugo kwehi? Bati, suwate Ukw'eki, kutse sugeraye kirya, kutse suutuule ukw'eki. Ebyosi ebi, bikahera omw'ikola lyabyo kusangwa ni bihano n'erikangirirya by'abandu".

Ebyosi ebi niibuugha ambu, erikangiirya ly'abandu, esyangangirirya nebihano byabandu , erihalamba abandu omo mwanya wa Kristo, erikirirya n'erikwama ebindi bitabu isiyo Bibilia, ni bindu ebikaletha eriyighaba-ghaba. Oko luhandi olhundi, obughuma bwanganabanikakandiibwayisyandirwamo, kulhusyaho omundu inyalyakwama Kristo. Ni Kristo oyuwasaba athi, "Sindisaba busana n'aba ibobene, niikwa busana n'abakendisyanyikirirya busana n'eritulago lyabo. Ngasaba nyiti abosi babye muguma. Uwe Tata! Nyiti, bamatikane ukwitwe, ngoko umatikene kwingye, kandi nage ngamatikene uk'uwe, neryo ekihugo kikiriraye k'uli inina we wanyituma" (Yoana 17:20,21). Lithya, Kristo mwasabira ekyithe thokekana? Eyihi. Ni kwenene obughuma bwanganabyaho. Mughulhu wahi? Omughulhu thwangakwama Kristo. Erikangirirya ly'abandu likaletha erithughabulha niikwa erikangirirya ly'eBibilia likendithuhambania.

Omo Efeso 4:1-6 thuwitheho erikumbu ly'obughuma. Hulikiirira: "Neryo ingye mundu w'omuliki busana n'omukama, ngabahatikana nyiti, mukwame emibere y'olulengo olu Nyamuhanga ababirikirira erikwamalo. Muyikehaye, mubye n'omutima molo, muyibombeke. Muganyirane omo lwanzo. Mulenge eribya n'obuguma obukalua oko Muliimu Abuyirire, kandi mubye n'obuholo obu kamatanaya haguma. Kusangwa hali omubiri muguma, n'Omuliimu Abuyirire muguma, ngoko Nyamuhanga ababirikira oko maha maguma. Hali Omukama muguma, n'erikirirya liguma, n'eribatiisya liguma. Hali Nyamuhanga Nyamuhanga muguma, Ise w'abandu bosu, oyuli endata oko bosu, kandi ali omo byosi". Uminye uthi eri n'ibirikirira busana n'obughuma. Minya kandi uthi, hali kighuma kisa oko bindu ebithondire ahighulhu. Nindi wangalengekania athi hali ebilhabire okwebi?

Obughuma bw'eKanisa bukalhangirika kusangwa Kristo mwabuugha athi akendisyahiimba eKanisa yiwe (Matayo 16:18), akaminyiisya nguma, n'ibuugha ambu omubiri wiwe kyinya-muliimu (1 (Korinto 12:27), kandi athi y'omuthwe wayo (Kolosai 1:18). Kwenene Kristo sihali oyuwangamutsweba athi awithe mibiri ibiiri kutse mithwe ibiiri. EKanisa yikasunzikanawa n'enyuumba ya Nyamuhanga kutse erihika lya Nyamuhanga (1 Timoteo 3:15). Niikwa ni nyuumba kutse mahika mangahi? Ni nguma. Thukasoma oko bwami bwa Kristo, kutse obwami bwa Nyamuhanga, ahali Kristo iy'Omukama (Yoana 3:3-5; Kolosai 4:11; 1 Timoteo 6:15). Ni mami mangahi aw'omukama awithe kandi hali bami bangahi? Ni muguma omo mibere eyosi.

Ni kwenene Bibilia yikaghana ekyirengekanio ky'ebisomo-bisomo, busana n'eriyiighabaghaba. Oko luhandi n'olhundi, yikasunziikanaya obughuma, erihikana, n'eribya kighuma. Bibilia

siyirisosekanayakanaya eKanisa ng'omubiri w'ekyithiko-thiko owakoliremo abandu b'ebisomo ebyosi, ahathe erisamalira oko syongangirirya syabu, nemikolere yabo, Niikwa ebibilia yikakanganaya ekanisa eribya ini ya Kristo, eyikolirwe omubandu ababirikirwe, abakwamire Kristo kandi ibabiryolhobera erikangirirya lyiwe, abalhamire. Kristo syayighabire-ghabire kandi n'ekalisa yiwe kuthya. Eriyighaba-ghaba kutse eryikirirya eriyighabulha omo nzira syosi-syosi, likabya in'ighania Kristo kandi nibya nekyo asabira.

Ebibuulyo

Hereraya erisuubirya erihikire:

1. Hane erisaba lyosi-lyosi busana n'obughuma bw'ekalisa?
2. Ni nzumwa yahi eyileka ihabya eriyitsuutsa inene omo bughuma bw'amaKalisa?
3. Obughuma bwangana banika omo maKalisa eryikirirya erithendibya bughuma?
4. Ekyangathokekania obughuma ni kyahi?.....
5. Abandu bakayitsuutsa ibakolha kyi imo hathoka eribya obughuma?.....
6. Nindi wasaba athi angambi thusabya muguma?...
7. Ekyike-ndisyalhuua omo bughuma ni kyahi?.....
8. Amasako akanatsweba eriyighaba-ghaba?.....
9. Omukama aponire ndi?.....
10. Thonda ebiri omo 1 Korinto 1:10.....
11. Buugha ebibuulyo bisathu (3)

ebyo Paulo abulhaya eKanisa ye
Korinto.....

12. Ni bithunga by'abandu byahi eby'erisamalira kutsibu nerisagha?.....
13. Bikakolera ndi?.....
14. Thune b'eriirinda kubo?.....
15. Nindi oyukaramiraya omukama y'obuyira?.....
16. Ni byahi ebyo Kristo asabira ?.....
17. Asabira ebithe-byanga-thokekana?.....
18. Thabuugha ekyangaleta obuholho.....
19. Hali bingahi ok'obuli kyighuma?.....
20. Ni maKanisa mangahi awo Kristo abya ahiimbire?..
21. Ekanisa ni kyi?.....
22. Omuthwe wayo ni ndi?.....
23. Kristo anawithe emibiri eyilhabire oko mughuma kutse emithwe eyilhabire oko mughuma?...
24. Ni maka mangahi aw'Omukama awithe?.....
25. Ekyiinywa kya Nyamuhanga kyikendithughabulha kutse kyikendithuhambania?....

Eky'eryigha 11

Ekyithondomo ekyemathegheko

w'eKanisa [Creed]

Ekyiinywa “Creed” kyikalhuua omo kyiinywa ky’Olhuyonani (credo) kandi kyikakanganiibawa eribya “eryikirirya, erilhayira oko bwikirirya bw’ekyisomo”; erithonda busana n’eryikirirya; omo bikuuhi, niby’erighenderako kutse obulengekania obw’erisondolerwamo n’erimatira kubo”. Omundu amalengekania okokyithondomoneryo akalengekanaya oko “abakwenda” erisubirira omo kyindu” kandi “nerisubirirya erya Niseni”. Nomo kyine kyithya, omo byosi ebi, Bibilia sirimo nakyighumaya. Erilhabya okw’ebyo, Obuli kyisomo ekyithekirweho n’abandu, kyinawithe ekyakyo kyithondomo omo musiindo w’eby’erighenderako (manuals), erisuyira, erithonda eryikirirya, n’ebindi, ebyosi niby’erithomekera oko kyiinywa kya Nyamuhanga.

Mbino, thukaherera amenge thuthi, ekyitabu kyosi ekyikasanganamo ebilhabire oko Bibilia, bikabya ibyamabyamo bingyi kwilhaba. Ekyitabu kyindi kyahi eky’ebithondomo ekyirimo bike oko Bibilia, kyikabya ikyirimo bike kwilhaba. Kandi kyitabu kyahi ky’ebithondomo ekyithemo kyindu niikwa Bibilia nyisa, sikiyiwithe mubongo kusangwa thwabithunga eBibilia. Eribisulirwa 22:18,19 na Galatia 1:6-9 hakakamiriraya ngoko sithutholere erithomekera oko kyiinywa kya Nyamuhanga, sithutholere erilhusyako, kandi sithutholere erisubiyamo bindi. Omo bindi binywa, amasako ahikene (2 Timoteo 3:1617), abuyirire (Yakobo 1:25), kandi thulib’erikania ng’eribuugha lya Nyamuhanga (1 Peter 4:11).

Nokweryo, sihali kiyitsutsire erithomekera ekyindi kiyitabu kutse bitabu eby'obuthokyi.

Ekyihugho ky'ebisomo munabwire kiyiighaba-ghabire, isi busana ambu abandu bakwamiire ekyiinywa kya Nyamuhanga, niikwa ni busana bakikiriraya eryikirirya eby'abandu. Kyikakanibawa ambu obuli Kanisa yikathunga ebilhayiro byayo, n'ebindi. Ekyi kyisa kyikakanganaya ngoko eBibilia yabirisighaniibwa. Ekyi ni ky'enaku. Erisaba lyethu liri lithi obuli muyiima kandi abosi balhwike ebitabu byabu ebikolirwe n'abandu neryo basube oko Bibilia, ekyiinywa kya Nyamuhanga. Nahabwekyo, erisaba lyetu, liri lithi, obuli mundu kutse abosi erileka ebithabu by'abandu n'erisuba omo Bibilia, icy'ekyinywa kya Nyamuhanga. Sikyangathughabulha niikwa kyikendi thuhambania omo Kristo Yesu.

Ekyithondomo kutse ekithabu kyobuthoki ky'eKanisa y'omukama ni kyahi? Sithuwithe mulhama y ghundi niikwa nina Kristo kandi sihali kyithondomo kutse ekitabu kyo buthoki niikwa yane Bibilia. Ebirengekanio n'erighanirya lyethu ni buyira. Sithuwithe ikumbulha ly'embitha lye Bibilia. Kyisa ekyo thuwithe ye Bibilia. Thukaliigha erikangirirya lyayo kandi thukakangiriraya abandi kuyo. Erisaba lyethu liri lithi, obuli muyiima asome kandi igheyo (Yoana 5:39; 2 Tomoteo 2:15, kandi thukasaba abandu abosi erikolha ekyo yikakangiriraya.

Sithuwithe kyindi kiyitabu kutse bindi bitabu ekyo thukwamire. Sithulikiriraya thuthi hali mundu oyuliho oyuwangahandika kiyitabu ky'ebihano n'ebilhaghiro ekyangayitsimba oko Bibilia. Sithuliikiiriraya thuthi Omukama ahererye mundu ndi y'obuthokyi bw'erisakanga ekyitabu. Sithuliikiiriraya thuthi Omuliimu Abuyirire abiribuhirira oko mundu ndi erisakanga ekyitabu.

Ky'ekyinywa kya Nyamuhanga kandi ekyiinywa kya Nyamuhanga kyisa ekyabirilhuua oku Nyamuhanga, ekyabilhaghira na Nyamuhanga kandi ekyangathulhamya. Erilholya embere, ekyiinywa kya Nyamuhanga ky'ekykendisyathutsvera oko kyiro ky'enduuli (Yoana 12:48). Nokeryo, eryikirirya okwenene, ukatholera eryowa okwenene (Baroma 10:17). Siky'eriswekya erilhangira ngoko bangyi bakathebawa omo myatsi y'ebisomo. Siky'eriswekya erilhangira ngoko hali erithalha-thalha linene omo kyihugho ky'ebisomo. Omundu akasonda obuwathikya erilua oko mundu omo kyitswa ky'erighenda ew'omukama. Abandu babiribindikira erikangirirya ly'abandu omo kyitswa ky'erighenda omo Bibilia. Kwenene omundu akatholera erisuba omo Bibilia amasonda erilhama.

Thulkakalhaliraya abandu erighenda omo Bibilia eriyigha okwenene kw'eKanisa. Omo kyihugho muli amaKanisa manene ini byutsutsu. Ni yahi ey'okwenene. Omundu mbino niw'erikolha eky'eryigha ok'obuli nguma? Eyih, omundu akatholera erighenda omo kytabu ekyithuulha okwenene oko Kanisa. Amabiri minya okwenene oko Kanisa y'omukama, syendisyathunga mulyambo erisondya eyikakwama engangirirya ye Bibilia.

Thukalhaliraya abandu erighenda omo Bibia eriyamiinya okwenene eky'omundu akatholera erikolha erisyabana omulhamo. Halinziranene esy'omundu angalhamiramo, erikwamana n'erikangirirya ly'abandu, niikwa omundu amaghenda omo kytabu kya Nyamuhanga, akasangana ikyikathondawa kyithi omundu akatholera eryowa okwenene, inyakwikirirya, inyayisubamo oko bibi byiwe, inyabuugha n'obuno bwiwe athi Kristo ni Mukama, n'eribatisibwa busana n'erisangulhwa kw'amalholhio (Mariko 16:15,16; Emibiri 2:38). Ni ngabane yahi eyikakolhawa oko ky'omundu akabuugha?

Omukama yukalhamaya, nokweryo omundu akatholera erimwowa n'erimwolhobera imwa nyalhamiibwa.

Thukalhaliraye abandu erighenda omo Bibilia eryigha eriramy Nyamuhanga. Ekyithasosire eky'omundu akabuugha ati hali nzira nene esy'eriramiryamo. Bibilia yikakangiriraya yithi hali nzira nguma nyisa kandi omukama mwakyikaniako ngoko kyikatholera omo kyiinywa kyiwe (Yoana 4:24).

Isimo syanzumwa hino nyisa, niikwa omo zumwa nene esindi esihambire oko mulhamo kandi n'engebe, n'obwa-Nyamuhanga, thukasaba abanduerighenda omo Bibilia eriyabana okwenene kw'omwatsi oyu. Omundu anemulengekania athi Bibilia siyangakengwa ndeke, kandi isyendikengayo ng'abandi, ekyi sikwenene. Omuyighu, akaletera omundu y'eriyihighulha oko Bibilia, imwasyahera. Niikwa erisyalhama akatholera eryasa hakuuhi nayo, inyikiriryayo, kandi inyaliigha athi yibye nyisa omusondoli omo myatsi y'ekyisomo. Aho hasa akesyalhamira, kusangwa aho hasa howanganira okwenene.

Ekyithondomokyethunikyahi? Ni Kristo Yesu n'ekyiinywa kyiwe. Ahathyekyo, sihali ghundi. Thukikiriraya thuthi Kristo ni Mughalha wa Nyamuhanga kandi thuthi Ekyiinywa kyiwe ky'ekyikaghunzerera. Thukalighakyo n'erikwama kyo kyisa. Thukasaba abandi erikolha bathya. Ebitondomo by'abandu bikakulholhaya oko kyighuma kyisa - ekuliimo. Yesu mwabuugha athi, "ingye indi nzira, nokwenene, n'engebe. Sihali erihika oko Thatha hathi ingye" (Yoane 14:6).

Ebibuulyo

Buugha erisubirya erihikire:

1. Ekyithondomo ni kyi?.....

2. EKanisa eyikolirwe n'abandu yikakolha kyi?
3. Buugha ekyikendisyabya okwabo abakathomekera kutse erilhusya oko kyiinywa.....
4. Amasako anahikene?
5. Ekyibughirire ni kyi?
6. Thukatholera eribuugha thuthi?
7. Hanayitsutsirwe ebindi bitabu by'obuthokyi?
8. Busana nakyi ekyihugho ky'ebisomo kiyiyighabire-ghabire munabirwe?.....
9. Bibilia yinganathughaba-ghaba?.....
10. Ekyithondomo ky'eKanisa y'omukama ni kyahi.....
11. Obulengekania nerighanirya lwethu binawithe muthambo?.....
12. Thunawithe bwiranda okwiyibindulira emyatsi ngoko thwanzire?.....
13. Handi omundu oyuliho oyuwangasakanga ekyitabu ekyalingana n'eBibilia?.....
14. Omukama anahererye obwiranda ow'erisakanga ekyitabu neryo akabuugha athi kyingene n'eBibilia?.....
15. Ekyiinywa kya Nyamuhanga kyalhuua hayi?.....
16. Ni kyiinywa kyahi ekyikendisyatswera omo kyiroyo ky'enduuli?.....
17. Okwenene ni kyi?.....

18. Omundu akasonda obuwathikya bwokondi?.....
19. Ni kytabu kyahi ekyi thukatholera erighendamo thukasonda eriminya okwenene?..
20. Hane nzira nene ey'erilhamiramo?.....
21. Bibilia yikakangiraya yithi kyi omundu amasonda erilhamiibwa?.....
22. Omukama anabirikangania omo kyiinywa kyiwe ekyakasonda omundu erikolha omwiramya?.....
23. Bibia yikanakengawa?.....
24. Thwangana kenga eBibilia omo musiindo mughumerera?.....
25. Nindi musa oyui nzira y'elhubulha?.....

Eky'eryigha 12

Eby'enyuuma y'eKanisa

Omo Emibiri y'abakwenda 2 ekyibanza kyikabatsawa busana n'erihimba eKanisa y'omukama kutse eritsuuka eKanisa kutse obwami. Abakwenda bane eYerusalemu, Omuliimo Abuyirire akabuthikako, ebihugho bingyi ibinimanibirwe kusangwa bihindene busana ne Pentekote. Petero n'abakwenda ibanemubuugha bathi eri ly'eribererera ly'ekyabuughibawa n'omumiinyeri Yoeli, Yesu abiriholha kobithya ebiro by'enyuuma-nyuuma byabiritsuuka. Eriyisubamo n'erisangulhw'ako ebibinimemuthuuliirwa, abandi abakahika 3000 bakowa erithuulirwa ly'engulhu yowene neryo babatishiibwa, n'omukama mwabathomeka oko Kanisa yiwe. Neryo

erilhwa eYerusalemu engukhu yamaghendera eghuma erilhaba Yudea, n'eriyahikira eghuma eSamaria, n'erika emusike w'ekyihugho, n'eriyaghunzerera obuli kyihangikwa ahisi y'olhubulha muby'owayo (Emibiri 1:8; Matayo 28:19-20; Mariko 16:15,16; Kolosai 1:23).

Ekanisa muyakulha-kulhana omo mughulhu w'abakwenda n'erilhandaghana lhuba-lhuba. Liinyuuma w'eribindulhwa lya Paulo, mwalendera ngendo isathu, isilikangiriraya aba Yuda basa niikwa n'oko bebihanda. Ekyabya kyalhire omo muhabanika abakabinduka bangyi, neryo muhabya erihindana lingyi ery'abikirirya mulyayitsatsanga omo Asia n'e Bulaya. Niikwa oyu syabya mwatsi alhobire, kusangwa habya ery'endererya linene. Oko nzuko, ekanisa muyatsuuka ery'endereriibwa eYerusalemu. Busana nekyo, abakwenda mubayitsatsanga eyisirya nerighenda elhuthambi n'elhuthambi ibanemuthuulha ekyiinywa (Emibiri 8:1-4). Endambi yinemughenda, abanya Roma mubatsweba abikirirya mubabahirako ebiritho byabu ambu babalekire ibya bahikako neryo bamabakwamirira omo myanya babyamo eRoma n'omo kyihugho ekyosi ekyabamoabanya Roma. Paulo kwahambawa athya n'erimuthwalha eroma omo mulikiyi n'eriyabuuliibwa. Ebisakango by'ekyihugho ebindi bikathuulhagho bithi abakwenda abosi, ghulhusiryeko Yoana musa, mubithibwa busana na Kristo esyangumi n'esyangumi, n'ebighonye mbino eeb'y'abikiriirya nabo mubiithibwa.

Ery'endereriibwa litheko, ekanisa muyakulha n'erighaliha. Siry'eryendereriibwa lisa eryabya eryabya lyahunzire ekanisa, niikwa ekyabya kyabere omo kathi k'ekkanisa iyiyene-yene. Omukwenda Paulo abya inyabirithuulha ekyiro ekyo ekanisa yasyathogheramo. Omo mwatsi eyindi abya inyabirbuugha athi ekyiro kyikendisyahika ekyo bangyi book bikirirya basya b'ekkanisa y'omukama

basyathoghera omw'ithalhuka. Niikwa thuhulikirire ekyabya abughire, "Neryo balikyetu, omo mwatsi w'erihika ly'omukama wetu Yesu Kristo, n'erihindana lyetu haguma naye, tukabalemba-lemba tuti, Simusukasukanibawe omo malengekania wenyu, kutse simuleke emitima yenyu akalua omo nda, busana n'ekirimu, kutse busana n'eriambuka ambu ni kinywa kyetu, kutse ebarua yetu biti, Ekiro ky'omukama kyabirihika. Simuleke mundu akabatebya omo mwatsi n'omuguma. Kusangwa Ekiro ekyo sikyendisyasa eripona n'erisuba enyuma bite byahika, n'omubi oyo ate abutuka, oyo wasyaheribwa. Iye akalwa n'esyosi esyo abandu bakahula mo nyamuhanga, n'ebyosi abandu bakaramaya. Asyayihamy endata oko syosi, n'eriya omo Hekalu ya Nyamuhanga, n'erikalala oko kitumbi omo Hekalu, n'eriyahula mo Nyamuhanga. Simulyibuka ngoko nababwira emyatsi eyi omugulu nabya nyikine nenyu kwehi? Kandi munasi ekikamukakiraya lino, erihika oko mugulu omundu mubi oyo asyabisulwa. Niikwa obubi obubisire bukakola na lino, niikwa oyukakakirayabo asyakakirya erihika oko mugulu asyalusibwaho. Neryo omundu Mubi oyo asyabisulwa, n'Omukama Yesu asyamwita omo muka w'obuno buwe, n'erimutogoty omo lukengerwa lw'erihuluka liwe. Neryo omundu mubi oyo asyasa omo butoki bw'eSatan n'erikola ebitiko-tiko by'emisindo yosi n'ebiminyiso by'amabehi, n'eby'eriswekera. Kandi asyakola omo misindo yosi y'eriteba nabi busana n'abakandisyahera. Nabo basyahera kusangwa mobatangirira kutse erianza ekwenene, eyangaleka ibalamibwa. Busana n'omwatsi oyu, Nyamuhanga akatumirabo eriteba erikalire, erikaleka ibikirirya eby'amabehi. Neryo kyasyaleka abosi abatikirirye oko mwatsi w'ekwenene, niikwa bakatsemera ebibi, ibasingwa. Inywe mwabiriyisogwa eribana omulamo" (2 Tesalonika 2:1-12).

Omw'ikanirya abakulhu b'eKanisa oko Efeso, Paulo

mwabuugha athi, “Muyitegaye inyw’ebene, kandi mutegaye ekihyo kyosi, ekyo Mulimu Abuyirire abiribayira eribya balangiri. Mubye balisya b’eKanisa ya Nyamuhanga eyo agula omo musasi wiwe iyowene-wene. Kusangwa nyinasi nabigenda, amakungu awakalire asyingira omo kati-kati kenyu, isyendisyabalya ekyihyo. Kandi abandu basyahangana omo kati-kati kenyu, ibakabuugha emyatsi y’amabehi, erikura abiga erikwamabo. Neryo mutegaye, mwibuke ngoko nabakangiriraya, obuli mundu omo myaka isatu omwitungi n’omo kiro, omo misonia” (Emibiri 20:28-31).

Ngoko Paulo ahabulha, muhabanika ababya omo kathi k’eKanisa abahangana n’eritsuuka erithalya bangyi book bikirirya ba Kristo eribathwalha eyihya y’eKanisa. Ebitabu ebindi eby’emyatsi yak era bikabuugha bithi eribambira mutsuukira oko busondoli bw’eKanisa, kutse emithondekere y’eKanisa. Endekatheka y’omukama yabya yithi obuli luhindano lhubye ilholhwene n’abakulhu balho hayiima n’awathikya babo. Niikwa linyuuma emighulhu yabere yalhaba, esyambinda-hindano esi musyatsuuka n’erihalhamba omukulhu mughuma kutse omuthungereri w’abandi, n’erighunzerera muhabya erilighira omughuma w’oko bakulhu banu erithabalha oko bandi bakulhu noko mbindahindano esilhabire oko nguma, neryo ekyabya kyalhwireomomukyabyaky’ekyihughokyosiomughulhu omughuma w’oko bathungereri banu mwasombolhwa eribya muthungereri w’ekyihughokyosi (oko Kanisa eyosi). Ni kwenene ekyi mukyithabya omo kyiroy kyighuma, niikwa ihamabirilhaba mwaka mingyi, neryo omo 606 A.D, Omuthungereri ow’erimbere mwabya Muthwe, kutse Papa, ow’ekyihandi ky’obuhona (obuhakani) ekye Kanisa, ekyabya kyalhwir’emo eKanisa ya Katoliki ngoko thwasiyo munabwire. Ekanisa y’omukama muyakwa kyi? Abayiketherwa abake mubalholya embere, alinga nibya isibaliminyererawa

ng'ekyithunga, niikwa omukama abya inyabirilgha
athi Obwami bwiwe kutse eKanisa yikesyabyaho kera
na kera, kandi athi yabya y'erikolha yithya.

Niikwa ng'ekyihugho eky'ebisomo, eKanisa ya Katoliki
muyahaghama. Eky'erithendibirirwa, muyathabalha
ekyihugho ekyosi neryo omo mwaka bikumi binene
muyaminywa mo "emyaka y'omwirimya - dark
ages". Ekyi mukyabya kusangwa eKanisa ya Katoliki
muyithikirirya eBibilia erisomwa abandu b'obuli
kyiro, iyikabuugha yithi abahereri basa babakatholera
erisoma n'erikenga eBibilia ambu neryo ibanabwira
abandu ebyo Bibilia yikabuugha. Ekyi kyikamiinyiisaya
kyithi ibakabwira abandu ebyo babya bakanza abandu
baminye bisa.

Omo mughulhu oyo n'eKanisa ye Katoliki nyisa-nyisa
muyayighaba-ghaba mo eya Baroma n'eba Guriki
busana n'ebindung'eritsanga oko bandu kw'amaghetse
bakabatisya hayiman'eryimbisya ebyuma omw'iramyia.
Endambi yabere yalhaba aba Katoli b'eRoma erilhwa
omu hithunga-hithunga hyabu hy'erihindaniramo,
n'ebindi, mubathomekako erikangirirya thethethe
omo mitheghekere yabu. Erighunzerera omo myaka
1500 eKanisa tya Katoliki muyabya iyabiritsanda omo
myatsi y'eryikirirya n'omo mitse neryo Omulhume
Martn Luther mwasondekania erisuba-subania eKanisa,
nayo inyane Muherereri. Nokweryo, mwahighulhwa
erilhwa omo Kanisa, neryo mwaghenda eriyakangirirya
n'erikolha ebyalengekanaya athi by'ebitholere.
Erilhwa omw'ekyi mumwabuthuka ekyikahulhamo
"erisuba buhya", kutse Obuhakani (Protestantism),
neryo erilhw'omo mumwalhwa ekyithwasi munabwire
nga ebisomo. Ekyilhubirilhwa kya Luther mumwalhwa
erisondisuba oko Bibilia omo kyihugho kyosi. Niikwa
kandi mubathathoka omo bwoswire erisuba oko
Bibilia.

Omo 1700 na 1800 omo Bulhaya n'omo Bwengereza mumwabya abandu b'ebisomo ababya ibama lhuha omwiyighaba-ghaba n'ekyimbunzange. Omo lyolho-lyolho mubatsuuka erisigha ebithere n'erisuba oko Bibilia. Erisonda lyabu sirya eritsuuka eKanisa nyihya-nyihya niikwa lyabya erisuba oko eyo babya bakasomako omo masako. Ekyo babya bakolire, n'erilhwa omo mughulhu oyo eriyitsutsa obwikirirya obw'endaghano nyihya-nyihya ey'erire bukahulikirirawa omo kyihugo ekyosi, esyangum n'ebighonye by'abandu bakalhwa omo ngangirirya sy'abandu ibakwamikyabya bakristo kutse bikirirya bomo Kanisa y'omukama, eBibilia nyisa iy'omusondoli wabu.

Abakristo, erighenda omo bihandi by'ekyihugho ebyosi bakakangirirya okwenene babirisangana eKanisa omo kwenene kwayo iyine omo bipindi bya Africa, India, Rusia, Poland, n'omo bindi bipindi. EKanisa eyi yineho namunabwire ngoko yinathulhaho. Sikyikulhu erironderery'ayo erilhwa aho yatsuukira imowaminya ghuthi inga y'eKanisa y'omo Bibilia. Erikwamakwamana ly'eKanisa eyi line omo Bibilia kandi thwamakwam'ayo ithukendibya Kanisa y'omukama. Embutho ky'ekyiinywa kya Nyamuhanga (Luka 8:11), kandi kyikabutha ekyindi ikyane kyighumerera munabwire n'ekyiyabuutha omo mughulhu w'abakwenda - abakristo n'abikirirya b'eKanisa ya Kristo. Thunasi ngoko obwami bw'omukama kubw'eryimana kera na kera. Nokweryo bune halebe erilhuua aho bwatsukibawa kandi bukendighenda embere n'eryimana, sihali mundu kutse enzighu erithunga obuthokyi bw'erihimbulhayo. Obu bw'obwami bw'omukama, eKanisa yiwe, eyinemukyinda erilhuuwa oko nzuuko erihika oko muhindo, nerighunzerera eryikalha kera na kera n'omukama.

Ebibuulyo

Hereraya erisbuirya erihikire:

1. Ni hayi omo Bibilia aho thukeghaya erisingikwa ly'eKanisa y'omukama?
2. Ni mo muuyi wahi aho yatsuukirawa?
3. Ni bangahi abathomekerawa oko Kanisa?
4. Ni handi hayi aho Engulhu yowene yathuulirirawa?
5. Ni ngendo singahi esy'erithuulha engulhu esyo Paulo abya alendererermo?.....
6. Paulo mwanathuulira omo Bayuda?.....
7. Ni mubihughi bibiri byahi omwabya mwasingikirwe eKanisa erilhaba omw'ithuulira lya Paulo?.....
8. Abakwenda mubakolha kyi omughulhu bayitsatsanga omo kyihugho?
9. Nindi w'endererya eKanisa y'omukama?.....
10. Ni bakwenda bangahi ababya bithibirwe busana n'eryikirirya lyabu?.....
11. Eklanisa muyana kulha kandi ihane ery'endereriwa?.....
12. Paulo mw'engehulha oko bihi busana n'omughulhu w'enyuma-nyuuma?.....
13. Eribambira eKanisa mulyatsuuka lithi?.....
14. Muhabya kyi omo mwaka wa 606 A.D.?

15. Ekanisa y’omukama muyakwa kyi?.....
16. Busana nakiy emyaka mingyi eyasubuka muyahulhw’amo “emyaka y’emwirimya”?
17. Thonda ebithunga bibiri eyo ekanisa ya Katoliki yayighaba-ghab’amo
18. Buugha erina ly’omulhume oyuwasonda erisubasubania ekanisa ye Katoliki.....
19. Busana nakiy mwasonda erisuba-subaniayo?.....
20. Omw’isndi suba-subania ekanisa mumwalhwa kithunga kyahi ekyinene?.....
21. Mubanathoka erisub’ighuma oko Bibilia.....
22. Omo mwaka wa 1700 na 1800 mumwabya kyi?...
23. Abandu aba, omwisuba oko Bibilia, mubanatsuuka ekinisa nyihya-nyihya erikwamana n’emithondekere ya Nyamuhanga?.....
24. Ekanisa eyo yanasangenwe n’abakristo iyine omo bipindi ebindi by’ekyihugho?.....
25. Ekanis ya Kristo ey’okwenene yineho omo mughulhu ono?.....

Eky’eryigha 13

Ekanisa omo mughulhu ono

Ekanisa y’omukama yatsuukawa hakuuhi emyaka 2000 eyilhabire (Emibiri 2) niikwa yiriho munabwire ngoko yanabya omughulhu oyo. Wangana buulya ghuthi, “Niikwa ekyi kyangathokekana kyithi?” omwikama

Endondekania y'eKanisa eyiri omo Ndaghano nyihya-nyihya.

Abandi bakalengekanaya bathi eriminya bathi eKanisa eyirihho munabwire yaneyatsuukibawa kera n'omukama, thukatholera ithwabulirirya mwaka oko mwaka erilhwa okwitsuuka ly'eKanisa oko Pentekote. Niikwa, ekyi si kwenne. Oko nzuuko thukatholera ithwibuka ngoko Omukama abiribuugha athi eKanisa yiwe siyendisyasambulya liriryo yikendiswabaho kera na kera (Danieli 2:44; Luka 1:33; Hebrania 12:28). Ekyi kyikami-nyisaya kyithi eKanisa yilhwe iyine omo ghundi mwanya eyo, erilhwa aho yatsuukira erihka munabwire. S'ibuugha ambu yibye om'obuli mwanya omughulhu oghosi ekyi eribererera. Omo mwanya oghundi, thunawithe embuthu y'obwami (Luka 8:11) yimabikire omo biinywa by'endaghano nyihya-nyihya. Kyamabya imukyana butha abakristo omo biro by'abakwenda na munabwire kyikendibabuutha. Abo ababya babere bakristo omo mughulhu w'erithuulhagho ly'abakwenda bamasangwa imubakolha eKanisa omughulhu oyo, ekyane kyighumakyanganabya munabwire. Nokweryo, kyinathokekene eKanisa y'omukama eribya ahosi ahali engaghano nyihya-nyihya, abawithoyo bamasangwa ibakendikolha ebyo yikabuugha.

Nyamuhanga omughulhu ghosi akahereraya abandu biwe Endondekania y'erikwama. Mwahererya Nuha y'endondekania y'erighenderako omw'ihimba obwatho (Enzuuko 6). Mwahererya Musa y'endondekania y'erihanda EHEMA, n'erihabulha athi, "Ulangire ghuti ebindu ebyosi ukakolabyo omo kyuutsuutsu ekyiryakukanganibawa oko kitwa" (Hebrania 8:5). Nokweryo, omo ndaghano nyihya-nyihya thwabirilhangira emithondekere eyibughirire eye Kanisa y'Omukama. Ngoko Nuha na Musa n'ababya b'erikwama emithondekere eyo

bahebawa, nethu kuthukatholera thuthya erikwama emithondekere y'eKanisa. Ngoko Nuha na Musa bakwama emithondekere y'obwatho n'eHema, na Nyamuhanga mwatsemera ebyalhw'omo, nethu omughulhu thukakwama emithondere y'eKanisa, Nyamuhanga akenditsemera ebikendilhw'omo omo mughlhu ekanisa yiriho ng'erisonda liwe, ahathe erithomekerako n'erilhusyako (Eribisulirwa 22:18,19).

Obuminyikalho obwosi obw'eriminyerera eKanisa bukanganibiirwe ndeke omo Ndaghano nyihya-nyihya. Omukama akabuugha ebyo eKanisa yiri, oyuwatsuuk'ayo, aho yatsuukira, omughulhu yatsuuk'amo, erina eryoyabya yasiibwemo, erina ly'abikirirya bayo, emsindo w'eriberamo mughuma w'akuyo, emiramirye yayo, kandi n'omuubiiri wayo. Yikathuulhagho n'omuthwe wayo nga nindi, obuughuuli bwayo, omulhamya wayo, n'ebindi. Ekyi kyikaleka ihathasabya erithika-thika nga ni yahi n'omuubiiri wayo. Emithondekere yayo yilhangirikire ndeke ngoko ekyiinywa kya Nyamuhanga kyine.

Nokweryo ekyo thukayisunza ly'eryigha eBibia imothwathoka eriminya eKanisa nguma eyokwenene ey'omo Bibilia. Thwamiigha okwenene kwayo, n'erikukwama, neryo thukendibya bikirirya ba muyo, neryo iyabya iyane Kanisa nguma ey'omukama atsuuka. Embutha yikabutha ebisosireyo n'ekyiinywa kya Nyamuhanga kyikendibutha abiikiiriirya munawire ngoko kyinalwe erilhwa enyuuma.

Ekanisa ya Kristo yanganasangwa omo kyihugho kyosi, yiri hano n'ehandi hosi. Yangabanika ehopsi-hosi oko ndambi syosi omughulhu omundu akakolha ebyo Bibilia yikakangiriraya. Yikenditsweka o'obuli kipindi ky'ekyihugho aho abandu bakaleka erikolha erisonda ly'omukama.

Ekanisa ya Kristo munabwire yinemukulha n'erilhandaghana kusangwa yikakwama eBibilia nyisa. Yikatsweba eriyighaba-ghaba n'eryo iyahalhamba Kristo. Eyi y'eKanisā nguma eyoghukasomako omo Bibilia. Sikyisomo kutse omukulhulho w'ebisomo. Sinyi hakani, Katoliki kutse ekyithunga ekyikathondolha. Neryo, nikiy? Omo bikuuhi, eKanisā y'omukama. Ekyo kyisa.

Ekanisa y'omukama siyiwithe muthwe oko kyihugho kutse omuyi mukulhu omo kyihugho ekyosi. Siyiwithe erithomekana lyosi-lyosi kyiinywa munge. Obuli Kanisa yikayithabalh'ako n'obusondoli bwayo iyoyene obulimo abakulhu n'abawathikya babu, abathuuliri, n'abikirirya. Omwikirirya mughuma syalisumbirawa eyighulhu oko bandi kusangwa eKanisā siyiwithe Mukulhu kutse ow'ahisi.

Ekanisa ya Kristo omughulhu munene yiwithe ebayighu namunabiwre kuthya. Ebisomo ebithekirweho n'abandu bikapon'ayo kusangwa bakabana eKanisā eyithendikwama eky'erilhangirirako kyabu. Bakapona eKanisā kusangwa siyangasangira nabo n'erighendera oko anguha lya Nyamuhanga. Banasi ndeke ngoko hane oyukasonda erikwama eBibilia nyisa, kandi ibo ibanemukwama erikangiiriirya ly'abandu. Bakayilhalikirira bathi eKanisā y'omo Bibilia yikakwamama Kristo musa kandi yambere eriina liwe, ibo ibanemukwama erikangirirya ly'abandu n'eryambalha amena w'abandu. Eby'amalhwa byabu oko Kanisa ya Kristo si kwenene, niikwa birimo erikubungulha emithima y'abandu, eryimanira buthuli, n'ebindi. Niikwa bakanubira busa.

Ekanisa ya Kristo yabirikyinda mughulhu muli erilhwa enyuuma. Abayighu b'ekyihugho kyino kandi n'emirim y'ekulimu yibyangakakiry'ayo. Yanabya nyike omo mughanzo yamasunziikaniibwa n'esithimbire

kuyo, niikwa ni nyike kusyo esikendisyalhama (Matayo 7:13,14). Kristo awithe Kanisa nguma kandi akensyasubulha busana n'eKanisa eyo (Efeso 5:27; Yoana 14:1-6). Iyo y'omukama w'obwami bunu kandi akendisyasa busana nabu n'eribuhemba oku Nyamuhanga (1 Korinto 15:24). Awithe omuheruki mughuma (Eribisulirwa 21:9) kandi ekendisyasa kyiro kyighuma erisyenda omuheruki oyo, oyo oyukambalha eriina lyiwe. Esindi ni kuthi? Akendisyabwiabo athi syaby'abasi. Akendisyabahehya (Matayo 15:13). Bakendisyakumwa-kumwa n'erighuswa omo muliro.

Erisaba lyethu munabwire bw'obwikirirya by'omo Ndaghano nyihya-nyihya. Musube oko kyiinywa kya Nyamuhanga muliighe kyibye musondoli wenyu. Muminye Bibilia neryo mukendiminya okwenene. Mukole ekyo yikabuugha neryo mukendilhamiibwa imwathomekerwa oko Kanisa y'omukama, eyo mukasomako omo Bibilia.

Wamabya ghuthe mwikirirya omo Kanisa ya Kristo, thukabaka-lhaliraya eribya muyo. Ikiriraya omo Nyamuhanga, yisubemo ebibi baghu, ahuulha Kristo mu Mughalha wa Nyamuhanga kandi wana batisiibwa wanganhamiibwa (Mariko 16:16; Baroma 10:10; Emibiri 2:38). Neryo Omukama akendikuthomeka oko Kanisa yiwe neryo iwabya Mukristo (Emibiri 2:47; Emibiri 11:26). Ukendikolha ekyo? Sihali mundu ukendikukaka erikolhakyoy, niikwa wamasoma Bibilia yaghu, thuwithe amaha thuthi nisonda lyaghu eribya Mukristo neryo iwaghunza engebe yaghu eyosi omwilengesya eribyaho busana n'omukama n'erilhalhania emithano y'obwami bwiwe.

Ebibuulyo

Hereraya ebihikire:

1. Ekanisa muyatsimbwa mughulhu wahi?.....
2. Ekanisa yineho munabwire?
3. Omundu anatholre erikwama-kwamania emighendere y'eKanis eritsuuka enyuuma imwinyikirirya athi eyi y'eKanis y'omukama?.....
4. Omukama mwabuugha athi eKanis yiwe yikendisyabyaho mughulhu muli athi?.....
5. Embutho y'obwami ni kyi?.....
6. Embutho yikendi butha kyi munabwire?.....
7. Buugha ekyo Nyamuhanga aby'ahere Noah na Musa.....
8. Emithondkere y'eKanis y'omukama ni yahi?.....
9. Obuminyikalho ob'weriminyereramo eKanis y'omukama buthondekire hayi?.....
10. Omukama akathubwira kyi oko Kanisa?.....
11. Thwangaminya thuthi eKanis nguma ey'okwenene?.....
12. Ekanisa ya Kristo yanagasanganwa hayi munabwire?.....
13. Ekanisa eyi nina kyisomo?.....
14. Yinawithe omuthwe muna kihugho?.....

15. Esyanzighu sy'eKanisa nisyahi?.....
16. Eby'amalhwa ni byahi?.....
17. Ekanisa yikanakyinda omo mwaka eyilhabire?....
18. Kristo akendisyasubira kyi?.....
19. Erisaba lyethu ni ryahi?.....
20. Hereraya eby'omundu akatholera erikolha eribya Mukristo kandi omwikirirya w'omo Kanisa y'omukama.....

Thekako akalingo; Kwenene, mabehi:

1. Kwenene, mabehi 1. Ekanisa eyo Kristo ahiimba yineho munabwire.
2. Kwenene, mabehi 2. Hali Kanisa nguma ey'okwenene.
3. Kwenene, mabehi 3. Yikambalha erina Kristo.
4. Kwenene, mabehi 4. Omundu akatholera eribya omo Kanisa eyi imw'alhama.
5. Kwenene, mabehi 5. Kristo akendisyasubulha kyiyo kyighuma busana ne Kanisa yiwe.